

摘藻堂四庫全書薈要

史部

欽定四庫全書薈要

史部

明史卷二百六十九至  
七十一



詳校官兵部主事臣雷純

欽定四庫全書薈要卷六千八百六十二

史部

明史卷二百六十九

大學士張廷玉等奉勅修

列傳第一百五十七

艾萬年

李卑

湯九州

楊正芳

楊世恩

陳于王

程

龍等

侯良杜

子天錫

張令

張之鳳

猛如虎

劉光祈等

虎大威

孫應元

姜名武

王來聘等  
鄧祖禹

尤世威

王世欽等

侯世祿

子拱極

劉國能

李萬慶

父萬年米脂人由武學生從軍積功至神木參將崇禎  
四年從曹文詔復河曲點燈子入山西萬年從文詔連  
敗之桑落鎮花地窰霧露山都司王世虎守備姚進忠  
戰死敗退屯石樓之康家山西距河三十里綏德知州  
周士奇守備孫守法伏兵含峪渡河襲殺之五年從參

政樊一衡討平不沾泥山西告警隸文詔東討與李卑  
一月奏五捷又與賀人龍敗八大王掃地王兵明年賊  
將東遁連破之延家山亢義村賈寨村擢副總兵初山  
西既中賊其土寇亦乘間起三關王剛孝義通天柱臨  
縣王之臣皆殘破城邑後見賊衰相繼歸順然陰結黨  
不散巡撫戴君恩親視事謀誅之七年正月迎春召王  
剛宴殺之并殺通天柱於他所而萬年亦捕殺王豹五  
與其黨領兵王生禽翻山動姬闕鎖掌世王獻俘京師

晉中巨盜畧靖豹五即之臣也有議君恩殺降者給事中張第元力言諸賊蹂躪之慘請錄萬年功萬年適遘疾告歸尋加都督僉事八年二月上疏言臣仗劍從戎七載復府谷解孤山圍救清水黃甫木瓜十一營堡轉戰高山設伏河曲有馬鎮虎頭巖石臺山西川之捷戰平陽汾州太原復臨縣及蹕亭驛大小數十戰精力盡耗與臣共事者李卑溘先朝露臣病勢奄奄猶力戰冀北又撫勦王剛豹五領兵王通天柱解散賊一萬三

千有奇蒙恩許臣養病而督臣洪承疇檄又至臣不敢不力病上道但念滅賊之法不外勦撫今勦撫俱未合機宜臣不得不極言夫勦賊不患賊多患賊走蓋疊嶂重巒皆其淵藪兵未至而賊先逃所以難滅其故則兵寡也當事非不知兵寡因糗糧不足為苟且計日引月長以至於今雖多措餉多設兵而已不可救矣宜合計賊衆多寡用兵若干餉若干度其足用然後審察地利用正用奇用伏用間或擊首尾或衝左右有不即時殄

滅者臣不信也次則行堅壁清野之法困賊於死地然後可言撫蓋羣賊攜妻挈子無城柵無輜重暮楚朝秦傳食中土以剽掠為生誠令附近村屯移入城郭儲精岳火器以待之賊衣食易盡生理一絕烏驚鼠竄然後選精銳據要害以擊之或體陛下好生之心誅厥渠魁宥其脅從不傷仁不損威乃撫勦良策帝深嘉之下所司議行然卒不能用其策也尋授孤山副總兵戍平涼當是時總督洪承疇迫六月滅賊之期急進戰諸將見



賊衆兵寡或自揣不敵而勢不可止萬年及副將劉成功柳國鎮遊擊王錫命合兵三千以六月十四日至寧州之襄樂遇賊大戰斬首數百伏兵驟起圍之數重萬年國鎮力戰不支皆戰歿成功錫命負重傷歸士卒死者千餘人事聞贈恤如制

李甲字侍平榆林人由千總擢守備天啟初總督王象乾設薊鎮車營五以甲為都司僉事統西協後車營遷山海關遊擊坐事罷歸崇禎二年陝西巡撫劉廣生議

討延慶回賊三道進兵命卑與遊擊伍維藩等由西路入卑簡精騎二百追擊兩晝夜行四百里抵保安寧塞連破之共獲首功一千有奇旋起延安參將時羣盜蜂起延安尤甚卑連敗之富家灣松樹屯四年神一元陷保安卑與寧夏總兵賀虎臣守延安賊不敢犯尋擢孤山副總兵譚雄陷安塞據其城卑與王承恩擊降雄戮之斬首五百三十餘級五年春混天猴陷宜君鄜州其夏攻合水卑及參將馬科追至甘泉山七月破之延水

關斬首六百二十餘級其地東限黃河賊溺死者無算  
科部卒斬混天猴以獻初卑及遊擊吳國俊等斬賊魁  
三人於甘泉橋子溝尋剿賊固原斬其魁薛仁貴等三  
人時陝西賊多流入山西詔卑及賀人龍各率部卒千  
隸總督張宗衡麾下會王自用陷遼州聞官兵至棄城  
走六年春諸軍入城多殺良民冒功卑獨嚴戒其下無  
所擾已敗賊陽城之郎家山又與艾萬年連敗之南獨  
泉土河村復敗之荅塢村賊入濟源山中巡撫許鼎臣

檄卑萬年合勦卑破之天井關七月臨洮總兵曹文詔  
改大同命卑代署其事協討河北賊加都督僉事數有  
功其冬賊盡走河南命卑援勦七年春敗賊內鄉馳至  
光化與楚兵敗賊蓮花坪白溝坪實授臨洮總兵官討  
賊湖廣賊多聚鄖襄總理盧象昇方倚卑辦賊六月卒  
於官卑善持紀律所至軍民安堵為人有器度當倉猝  
鎮靜如常贈右都督賜祭葬

湯九州石埭人崇禎時昌平副總兵六年夏流賊大至

擾河北畿南命九州協勦與左良玉等屢破賊兵賊悉  
渡河而南其冬大敗過天星於吳城鎮斬首四百二十級  
級追賊閻天王等五華集又敗之斬首六百四十餘級  
七年擊賊嵩縣之潭頭斬首三百二十級賊駐商維謀  
再入山西左良玉迎擊於商南九州遣部將趙柱周爾  
敬逆之雒南賊至商州返已復侵閩鄉九州病遣部將  
凌元機朝良翰等搜山悉敗歿九州尋赴援山西未幾  
以河南勦賊功加都督署僉事八年春被劾褫官從軍

自効洪承疇入關以吳村瓦屋為商南賊走內鄉浙川  
要地令九州偕良玉扼之尋移駐洛陽九年二月賊走  
登封石陽關與伊嵩賊合九州期良玉夾擊良玉半道  
歸九州以孤軍千二百人由嵩縣深入賊屢敗窮追四  
十餘里悞入深崖遇賊數萬據險攻圍九州勢不敵夜  
移營為賊所乘遂戰歿從孫文瓊伏闕三上書請卹不  
報文瓊後亦殉難時有楊正芳者天啓間以小校從軍  
屢勦貴州賊積功至副總兵叙桃紅壩功加署都督同

知崇禎三年擊破定番叛苗七年賊陷當陽正芳以鎮  
筭兵敗賊班鳩灘復其城湖廣巡撫唐暉以獻陵惠藩  
為重令正芳及總兵許成名專護荊州承天正芳連奏  
金沙鋪蓮花坪白溝坪官田石門山之捷陳奇瑜出師  
鄖陽正芳偕成名鄧玘從竹山竹谿白河分道進皆大  
獲至十月正芳督筭兵千餘援雒南戰敗及部將張上  
選皆死馬一軍盡歿贈太子少師左都督世廕指揮同  
知再廕一子守備賜祭葬有司建祠又有楊世恩者崇

禎時歷官湖廣副總兵七年春敗賊竹谿大雨山水驟  
發賊多漂溺死餘潰走世恩疾擊斬鎮山虎等四十餘  
人已追賊石河口連戰康家坪蚬溪功最八年冬敗賊  
孝感九年春祖寬大破賊滁州世恩從盧象昇馳至復  
大破之十年春與秦翼明破劉國能于細石嶺獲其魁  
新來虎賊陷隨州責戴罪自贖十二年冬督師楊嗣昌  
令守宜城會賊羅汝才惠登相分屯興山遠安夷陵告  
急嗣昌檄世恩及荆門守將羅安邦赴救至洋坪猴兒



洞道險甚嗣昌再檄召還而安邦由祚峪世恩由重陽坪已兩道深入期至良馬坪合兵汝才登相圍之香油坪嗣昌連發數道兵往援皆以道遠不能進世恩等被困久突圍走黃連坪絕地無水士饑渴甚賊至兩軍盡覆世恩安邦竝死

陳于王字丹衷吳縣人世為蘇州衛千戶既襲職兩舉武鄉試授奇兵營守備以捕獲海盜功遷都司僉書守崇明蛇山盜王一爵等亂海濱于王率戰艦數十擊之

羊山持刀躍入其舟生禽一爵殲其黨殆盡上官交薦  
遂知名天啟初經畧熊廷弼用為標下參將代者至飲  
于王酒暴卒其子訴于王毒殺之逮繫久不釋崇禎二  
年京師有警巡撫曹文衡賞其罪署前鋒遊擊將兵勤  
王既至兵事已解遂南還久之巡撫張國維用為中軍  
守備九年賊入江北圍廬州陷和州國維遣于王守六  
合守備蔣若來守江浦賊方圍江浦若來急入與知縣  
李維樾固守賊登城若來拒却之縋下角賊矢著其頰

左臂傷裹血還戰賊乃退六合無城若來與于王犄角  
捍賊二邑賴以全賊犯宿松于王弟國計偕指揮包文  
達等以二千人往救文達敗歿于王驟馬入拔其弟而  
出十年正月賊分犯江浦六合及安慶國維遣部將張  
載賡等援安慶而以新募兵二千令副將程龍及于王  
若來分成二邑已而賊不至國維議赴安慶城太湖乃  
提龍等三將兵西上三月賊犯太湖副將潘可大將安  
慶兵九百龍等三將將吳中兵三千六百禦之鄧家店

賊先犯可大營龍等至夾擊之賊多死夜復至中伏亦敗去監軍史可法欲退扼要害諸將不從掘塹守二十四日羅汝才劉國能等七營數萬衆齊至圍數重諸將突擊頗有殺傷可法偕副將許自強馳救扼於賊鳴大礮遙為聲援諸將亦呼譟突圍會天雨甲重不得出明日日中賊四面八將士短兵接戰可大戰死龍引火自焚死于王手執大刀左右殺賊傷重力竭北面叩頭自刎死閱十日面色如生若來服圍人衣以免同死者武

舉詹兆鵬首觸石死陸王猷殺賊過當賊鬻分其肉死  
莫是驛詹世龍及千戶王定遠皆力戰死百戶王弘猷  
為賊所執鋸齒斷足罵不絕聲死士卒脫者僅千餘人  
事聞贈于王昭勇將軍指揮使世廕副千戶餘贈廕有  
差

侯良桂字朝石永寧衛人天啓初累官四川副總兵討  
奢崇明父子復遵義城又與參議趙邦清招降奢寅黨  
安鑾六月五日代李維新為四川總兵官鎮永寧時崇

明敗奔水西與安邦彥合貴州兵數討不克崇禎二年  
總督朱燮元遣貴州總兵許成名復赤水衛崇明邦彥  
以十餘萬衆來爭成名還永寧賊追之銳甚良桂偕監  
軍副使劉可訓出戰小却成名等來援賊乃據五峯山  
挑紅壩越數日良桂乘賊不備與副將鄧玘等侵早霧  
迫之賊大潰成名聞山上呼噪聲亦出賊奔鵝項嶺徑  
長而慙人馬不能容良桂玘軍至賊復大敗死者數萬  
人崇明邦彥與邦彥黨偽都督莫德竝授首俘其黨楊

作等數千人積年巨寇平時稱西南奇捷四川巡撫張  
論上其功不及黔將成名等怒言邦彥德乃已部將趙  
國璽所斬且崇明猶未死燮元信之奏於朝兵部不能  
決賞久不行御史孫徵蘭言訊俘囚阿癡楊作等咸云  
邦彥即時授首灼然非黔兵力帝即命獻俘告廟傳首  
九邊川中撫按及御史毛羽健皆訟良柱可訓功詆燮  
元燮元疏辯且求去賞遂格不行良柱怨燮元不為用  
至與相訐奏解職候勘久之御史劉宗祥列上功狀七

年八月始錄前功進良柱左都督世廕錦衣指揮僉事  
成名等亦優叙未幾復為四川總兵官八年夏總督洪  
承疇大舉討賊令良柱扼賊入川路戰鳳縣三江口斬  
首三百七十有奇明年冬賊犯漢中瑞王遣使乞師良  
柱督兵援與他將同却賊十年四月川中地震者七地  
鳴者一占主兵賊果入犯陷南江通江帝切責良柱及  
巡撫王維章時良柱駐廣元盡召諸地兵九千有奇分  
防扼險止千餘人賊已知其勢弱五月復寇川北維章



告急於朝會賊轉掠他所良柱乃撤還守隘兵專守廣  
元維章以為非計上章言之十月李自成過天星混天  
星等陷寧羌分三道入寇良柱急拒戰於綿州象寡不  
敵陣亡賊直逼成都維章方守保寧反在外連失三十  
餘州縣帝大怒命逮二人下詔獄猶未知良柱死獄成  
維章遣戍追奪良柱官十三年良柱子指揮天錫伏闕  
言臣與賊不共戴天願捐貲繕甲選募勁旅及臣父舊  
將自當一隊與賊血戰下雪父耻上報國恩帝深嘉之

命授遊擊赴嗣昌軍立功已嗣昌言天錫所將親丁二百六十人及召募精卒五六百人皆剽悍敢戰帝益嘉之再贈一秩

張令永寧宣撫司人天啓元年奢崇明反令為偽總兵從攻成都令雖為賊用非其志崇明敗歸永寧令結宋武等乘間禽其偽丞相何若海率眾以降崇明怒殺令一家夷其先墓巡撫朱燮元言令等為國忘家請優擢示勸命與武並授參將後屢從大軍征討頻有功加副

總兵仍視參將事後實授建武遊擊崇禎中屢遷副總兵鎮川北七年流賊入犯總兵張爾奇以令為先鋒副將陳一龍武聲華為左右翼拒之員山令追至龍潭一龍等不至面中三矢斬賊百餘級而還賊犯畧陽令又擊敗之扼保寧漢中諸要害秦賊不敢犯十年冬李自成等陷四川三十餘州縣總兵侯良柱陣亡令獲免楊嗣昌之督師也張獻忠等悉奔興安為令所扼不得入漢中乃轉寇夔州十三年二月大敗瑪瑙山走岔溪千

江河令復與副將方國安大破之令時年七十餘馬上  
用五石弩中必洞胸軍中辨神弩將獻忠轉入柯家坪  
其地亂峯錯峙箐深道險令率衆追及之分其下為五  
鼓勇爭利賊衆官軍寡國安為後拒他道逸去令獨深  
入被圍居絕阪中屢射賊營應弦斃者甚衆水遠士渴  
賴天雨以濟圍終不解襄陽監軍僉事張克儉言于總  
督鄭崇儉曰張令健將奈何棄之急令參將張應元汪  
之鳳從八台山進總兵賀人龍從滿月槽進三月八日

應元等先至令方與賊鬪呼聲動山谷應元等應之內  
外夾擊賊乃敗去令與賊萬餘相持十三日所殺傷過  
當其卒僅五千耳時巡撫邵捷春駐重慶遣守黃泥窪  
倚令及秦良玉為左右手後捷春移大昌以令守竹筍  
坪防賊逸九月獻忠兵大至令力戰中矢死軍遂敗之  
鳳既解柯家坪圍後與應元同守夔州之土地嶺部卒  
多新募獻忠盡銳來攻之鳳應元力戰賊分兵從後山  
下突入其營應元突圍出之鳳走他道免山行道渴飲

斗水卧血凝臆而死踰月令亦戰死軍中失二將為奪  
氣

猛如虎本寨外降人家榆林積功至遊擊崇禎五年擊  
邢紅狼於高平解其圍明年敗賊壽陽黑山覆姬關鎖  
軍已從曹文詔追賊西堰碧霞村斬混世王與頗希牧  
逐賊壽陽東又與陳國威馬杰破來遠寨從文詔大破  
賊范村國威以步卒三百夜劫賊紅山嶺如虎杰及虎  
大威和應詔擊殺九條龍尋以巡撫許鼎臣命由文水

入山勦賊又與大威應詔杰由阜落山勦東犯之賊竝  
有功賊流入畿南山西警漸息如虎仍隸鼎臣七年勦  
賊沁源馘五條龍如虎驍果善戰與虎大威齊名戴君  
恩吳姓相繼為巡撫竝委任之以功進參將其年冬賊  
在河南欲乘冰北渡如虎大威扼之河濱八年一月與  
大威國威斬劇賊高加計山西賊盡平用牲薦加副總  
兵其冬以防河功加署都督僉事連歲防河及援勦河  
南賊勞績甚著十一年冬京師有警如虎督兵勤王明

年四月擢薊鎮中協總兵官十三年坐事落職發邊方立功督師楊嗣昌請於朝令從入蜀十一月監軍萬元吉大饗將士於保寧以諸軍進止不一擢如虎為正總統張應元副之率軍趨綿州分遣諸將屯要害而元吉自間道走射洪扼蓬溪以待賊賊方屯安岳界偵官軍且至宵遁扼內江如虎簡驍騎追之元吉應元營安岳城下以扼其歸路十二月張獻忠陷瀘州其地三面阻江惟立石站可北走元吉以賊居絕地將遣大兵南搏



其老巢而伏兵旁寨王蟾寺蹙賊北竄永川逆而擊之  
可盡殄永川知縣已先遁城中止丞簿一二人如虎覓  
嚮導不可得夜宿西關空舍及扞立石賊已先渡南溪  
返走關中將賀人龍軍隔水不擊賊遂越成都走漢川  
德陽渡綿河入巴州明年正月嗣昌親統舟師下雲陽  
檄諸將陸追賊諸軍乃盡躡賊後賊折而東返歸路悉  
空不可復遏如虎所將止六百人餘皆左良玉部兵驕  
悍不可制所過肆焚掠惟參將劉士杰勇敢思立功諸

軍從良王多優閒不戰改隸如虎馳逐山谷風雪中咸  
怨望謠曰想殺我左鎮跑殺我猛鎮時賀人龍兵已大  
譟西歸所恃止如虎元吉深憂之賊自巴州至開縣官  
軍追之遇諸黃陵城日晡雨作諸將疲乏請詰朝戰士  
杰奮曰四旬逐賊今始及之舍弗擊我不能也執戈先  
如虎激諸軍繼之士杰所當輒摧陷獻忠登高望官軍  
見無後繼密抽壯騎潛行箐谷中乘高大呼馳下良王  
兵先潰士杰及游擊郭開如虎子先捷竝戰死如虎率

親兵力戰部將挾上馬潰圍出旗纛軍符盡失乃收殘  
卒從嗣昌下荊州及嗣昌死率所部扼德安黃州會疽  
發背不能戰退屯承天尋移駐南陽十一月李自成覆  
傅宗龍兵乘勢來攻如虎與劉光祚憑城固守用計殺  
賊精卒數千已而城破如虎持短刀巷戰大呼衝擊血  
盈袍袖過唐府門北面叩頭謝上恩自稱力竭為賊摧  
死光祚及分守參議艾毓初南陽知縣姚運熙竝死之  
唐王亦遇害光祚字鴻基榆林衛人初為諸生棄去承

祖蔭歷官延綏游擊崇禎三年奉詔勤王與何可綱等  
戰灤州有功遷汾州參將五年與遊擊王尚義敗賊張  
有義於臨縣賊還兵犯之軍盡覆光祚僅以身免被徵  
未行偕諸將復臨縣詔除其罪六年賊犯石樓光祚分  
三道擊大敗之斬隔溝飛撲天虎等六人獲首功三  
百七十又數敗賊於臨縣永寧撲天飛等詐降光祚設伏  
斬之已擊敗賊魏家灣黑茶山七年勦敗王剛餘黨斬  
四百餘級加署都督僉事為山西副總兵敗賊崞縣復

其城八月賊渠賀宗漢號活地草者見其黨劉浩然高  
加計破滅偽乞降光祚伏兵斬之晉中羣盜皆盡乃移  
光祚於宣府久之命率兵援剿河南十一年連敗賊白  
果園襄城已擢保定總兵官仍協討河南賊其冬畿輔  
有警馳還鎮

大清兵薄保定以光祚堅守不攻而去光祚尋從總督  
孫傳庭南下明年二月

大清兵還至渾河值水漲輜重難渡諸將王樸曹變蛟

等相顧不敢犯光祚恒怯尤甚視師大學士劉宇亮劾之詔即軍前正法光祚適報武清捷宇亮乃繫之武清獄而拜疏請寬帝怒罷宇亮論光祚死十四年大學士范復粹錄囚力言光祚才武命充為事官戴罪辦賊光祚舉廢將尤翟文等帝亦從之當是時賊已陷河南襄陽中原郡縣大抵殘破光祚士馬無幾督師丁啓睿尤怯光祚雖少有克捷而賊勢轉盛及傳宗龍敗歿於項城南陽震恐光祚適經其地唐王邀與共守城陷遂死

虎大威榆林人本塞外降卒勇敢嫻將畧從軍有功累官山西參將崇禎三年冬從總兵尤世祿擊王嘉允於河曲力戰被傷五年從總督張宗衡勦賊臨川潞安陽城沁水連勝之明年從巡撫許鼎臣擊賊介休殲其魁九條龍時賊去山西遁據輝林武陟山中約二萬餘鼎臣令曹文詔自黎城入大威猛如虎諸將自阜落山入賊屢敗尋移大威守平陽七年巡撫吳甦至察諸將中惟大威如虎沈毅可屬兵事委任之其冬與如虎等扼賊

渡河高加計據奇嵐四出剽掠明年三月二將追至忻代山中加計馬上舞三十觔長挺突陣大威射殺之追斬其衆五百人餘黨悉平銍薦二人忠勇進大威副總兵其冬以扼賊加功署都督僉事九年八月畿輔被兵率師入援明年春命援勦陝西賊遂代王忠為山西總兵官上疏言諸將討賊零級不可取生口不可貪封域不可限帝採納之十一年詔兵部甄別諸大將大威以稱職增秩其年冬京師戒嚴命總督盧象昇統大威及



宣府總兵楊國柱大同總兵王樸入衛尋從象昇轉戰至鉅鹿賈莊被圍數匝象昇死焉大威等潰圍出督師劉宇亮總督孫傳庭皆言大威國柱敢勇身入重圍視他將異乞令立功自贖大威亦上章請罪帝不從卒解其任尋令從軍辦賊十四年正月李自成圍開封總督楊文岳遣大威及副將張德昌先率五千人渡河會賊已解圍去乃會河南巡撫李仙風於偃師以兵少未敢擊賊待文岳軍至與賊戰鳴臯大破之又與監軍道任

棟挫賊平峪七月自成及張獻忠羅汝才攻鄧州大威  
從文岳擊破之斬首千餘級陝西總督傅宗龍出關討  
賊文岳大威會之九月次新蔡抵孟家莊將戰秦帥賀  
人龍軍先潰大威軍亦潰遂奔沈邱賊連陷河南鄧許  
再圍開封大威從文岳援之賊引去明年二月師次郾  
城督師丁啓睿總兵左良玉方與賊鏖戰文岳督大威  
及馮大棟張鵬翼等合擊賊大敗相持十一晝夜俘斬  
數千賊遂東陷陳州歸德已復圍開封七月朔啟睿文

岳大威及良玉楊德政方國安之師畢會啟睿欲急擊  
良玉不從先走大威諸軍亦走帝大怒立誅德政黜譴  
啓睿諸人大威時奔汝寧出攻賊寨中礮死乃免其罪  
大威為偏裨最有聲及為大帥值賊勢益張所將止數  
千人不能大有所挫然身經十數戰卒死王事論者賢  
之

孫應元不知何許人歷官京營參將督勇衛營勇衛營  
即騰驤武驤四衛也其先隸御馬監專牧馬莊烈帝銳

意修武備簡應元及黃得功周遇吉等訓練遂成勁旅  
崇禎九年秋從張鳳翼軍畿輔有功進副總兵再以功  
增秩一等明年河南賊熾應元得功慷慨請行帝壯之  
發卒萬人監以中官劉元斌盧九德戒毋擾民諸將奉  
命軍行肅然十二月大破賊鄭州再破之密縣先後斬  
首千七百明年正月大破之舞陽光山固始四日三捷  
斬首二千九百有奇賊乃謀犯江北元斌九德南趨潁  
州護鳳陵密遣應元得功督騎兵扼賊前自南而北破

之方家集賊遂由固始走商城錄功加都督僉事已復破之新野又大破之遂平熊文燦方主撫不戰而賊憚應元等多降降者亦不遽叛文燦以此擅撫賊功已而京師有警台應元等還賊遂無所忌帝初聞禁軍屢破賊大喜累加應元都督同知賜銀幣蟒服至是論功遂進左都督加銜總兵官世廕錦衣副千戶十二年五月張獻忠羅汝才復叛仍命元斌九德監應元得功軍南征應元等馳至南陽會馬光玉屯淅川之吳村偽乞撫

規渡漢江應獻忠浙川知縣郭守邦說降其黨許可變  
胡可受可變即賊改世王可受則安世王也可變夜至  
處之東關可受為光王所持約未定應元得功趨內鄉  
掩其背令副將周遇吉等分道別擊之文燦所遣陳洪  
範亦至八月至小黃河口參將馬文秀等力戰可受敗  
呼曰始與許王約降者我也今歸命遇吉駐馬受之應  
元得功遂進兵王家寨賊分屯南北兩山用本石塞道  
應元率文秀戰其南得功率副將林報國戰其北河南

兵又扼華陽關賊遂大敗光玉遁免元斌至軍檄除可  
變可受罪授以官報先後首功三千人及楊嗣昌督師  
襄陽令元斌應元成荆門護猷陵十三年七月與副將  
王允成王之綸監軍僉事孔貞會等大破羅汝才於豐  
邑坪斬首二千三百生禽五百有奇混世王小秦王皆  
降時稱荆楚第一功十五年春擊賊羅山力戰孤軍無  
援遂陣歿贈卹如制應元善戰在行間多與黃得功偕  
應元死得功勲益顯故其名尤震於世

姜名武字我揚保德州人舉天啓二年武會試授大同威遠守備崇禎初遷大水峪遊擊築杏山城有功遷宣府西城參將擊斬大盜王科移守宣府右衛擢通州副總兵護諸陵有功以故官典保定總督楊文岳中軍兼忠勇營團練事十五年李自成圍開封急名武從文岳往援時諸軍壁朱仙鎮者十餘萬左良玉最強一夕其軍大譟突諸營諸營驚潰其軍遂乘亂掠諸營馬贏以去於是諸營悉奔獨名武一軍堅壁不動侵晨賊大至



督麾下血戰殺數百人力竭被執大罵為賊磔死贈特  
進榮祿大夫右都督廕外衛世襲總旗其子援王來聘  
甄奇傑例乃議贈特進光祿大夫左都督世襲錦衣百  
戶疏上踰月而都成陷不果行來聘京師人崇禎四年  
中武會試時帝銳意重武舉子運百斤大刀者止來聘  
及徐彥琦二人而彥琦不與選帝下考官及監試御史  
獄悉貶兵部郎二十二入遣詞臣倪元璐等覆閱取百  
人視文榜例分三甲傳臚錫宴以前三十卷進呈欽定

一甲三人來聘居首即授副總兵武榜有狀元自來聘始也來聘既拜命泣然流涕曰上重武若此欲吾儕效命疆場爾不捐軀殺賊何以報上恩明年孔有德據登州叛官軍攻之久不下又明年二月以火藥轟城城壞將士踴入輒為賊擊退來聘復先登中傷而死天子惜之贈廕有加奇傑亦官副總兵隸楊文岳麾下從擊賊河南戰死先是又有鄧祖禹者蘄水人舉萬厯四十七年武會試授瀋陽守備嘗出戰中矢死夜半復甦創甚

告歸崇禎初起宣府遊擊入衛京師副將申甫軍歿祖  
禹力戰盧溝橋擢涿州參將疏請召對不許入朝上書  
聲甚厲為御史所糾下獄然帝頗採其言久之赦出為  
辰沅參將禽苗酋飛天王張五保斬首千五百級夷其  
巢擢副總兵轄德安黃州攻賊土壁山盡掩所獲為已  
有當事將劾之請勦寇自贖乃令援應城將七百人入  
城賊大至圍數重祖禹突圍保西城外賊復圍之軍敗  
被執賊說降怒罵不屈賊言之再三復罵曰若此須換

却心肝賊笑曰換不難遂剖心剜肝而死

尤世威榆林衛人與兄世功弟世祿並勇敢知名天啟中世威積官建昌營參將調守牆子路七年遷山海中部副總兵寧遠告警從大帥滿桂赴援力戰城東有功增秩受賜崇禎二年擢總兵官鎮守居庸昌平其冬京師戒嚴命提兵五千防順義俄命還鎮防護諸陵四年代宋偉為山海總兵官積資至左都督七年命偕寧遠總兵官吳襄馳援宣府坐擁兵不進褫職論戍未行會

流賊躡河南詔世威充為事官與副將張外嘉統關門  
鐵騎五千往勦明年正月賊陷鳳陽世威以二千五百  
騎赴之抵亳州會總督洪承疇出關討賊次信陽命世  
威趨汝州甫二日承疇亦至時賊見河南兵盛悉奔入  
關中承疇將入關征討乃大會諸將令分防汝雒諸要  
害以世威部下皆勁旅令與參將徐來朝分駐永寧盧  
氏山中以扼雒南蘭草川朱陽關之險戒之曰靈陝賊  
所出入汝勿懈及承疇既入關賊避之而南復由藍田

走盧氏扼於世威仍入商雒山中來朝所部三千人不肯入山大譟賊至來朝逃一軍盡歿世威軍暴露久大疫與賊戰失利世威及遊擊劉肇基羅岱俱負重傷軍大潰賊遂越盧氏走永寧事聞命解任候勘十年宣大總督盧象昇言世威善撫士卒曉軍機徒以數千客旅久戍荒山疾作失利今當用兵時棄之可惜乃命赴象昇軍自効及象昇戰歿自免歸十五年以廷臣薦命與弟世祿赴京候調召對中左門復告歸明年十月李自

成陷西安傳檄榆林招降總兵官王定懼率所部精兵  
棄城走時巡撫張鳳翼未至城中士馬單弱人心洶洶  
布政使都任亟集副將惠顯參將劉廷傑等與里居將  
帥世威及王世欽王世國侯世祿侯拱極王學書故延  
綏總兵李昌齡議城守衆推世威為主帥無何賊十萬  
衆陷延安下綏德復遣使說降廷傑大呼曰長安雖破  
三邊如故賊皆中州子弟殺其父兄而驅之戰必非所  
願榆林天下勁兵一戰奪其氣然後約寧夏固原為三

師迭進賊可平也衆然其言乃歃血誓師簡卒乘繕甲  
仗各出私財佐軍守具未備賊已抵城下廷傑募死士  
乞師套部師將至賊分兵却之攻城甚力官軍力戰殺  
賊無算賊益衆來攻起飛樓逼城中矢石交至世威等  
戰益厲守七晝夜賊乃穴城置大礮轟之城遂破世威  
等猶督衆巷戰婦人豎子亦發屋瓦擊賊賊屍相沈籍  
既而力不支任死之侯世祿父子及學書俱不屈死賊  
怒廷傑勾套部磔之至死罵不絕口世威世欽世國昌



齡並被執縛至西安自成坐秦王府欲降之四人不屈  
膝自成曰諸公皆名將助我平天下取封侯可乎衆罵  
曰汝驛卒敢大言侮我自成笑前解其縛世欽唾曰驛  
卒毋近前汙將軍衣自成怒皆殺之時顯亦被執大罵  
賊賊惜其勇繫至神木服毒死王世欽大將威子歷山  
海左部總兵官謝病去崇禎八年洪承疇起之家擊李  
自成有功即謝歸十六年召對中左門未及用而歸遂  
死於賊世國威弟保定總兵官繼子由柳溝總兵官罷

歸甫數日竟拒賊以死世威弟世祿為寧夏總兵官累著戰功至是與世威同死世威從弟翟文為靖邊營副將嘗從洪承疇敗高迎祥於鳳翔之官亭斬首七百餘級至是率敢死士出南門奮擊殺傷甚衆中矢死又有尤岱者由步卒起家至山海鐵騎營參將數有功忤上官棄職歸守水西門城陷自殺廷傑既死其父副使彞鼎聞之不哭曰吾有子矣其弟廷夔收兄屍亦自投閤死昌齡字玉川鎮番衛人為延綏總兵官數有功以剛直

罷徙居榆林賊至或勸之去昌齡曰賊至而遁非勇也見難而避非義也起偕世威等同守城卒同死

侯世祿榆林人由世職累官涼州副總兵遼事亟詔擢總兵官提兵赴授世祿勇敢精悍為經畧熊廷弼所知及袁應泰代廷弼亦倚任之天啟元年應泰議復撫順清河以世祿及姜弼梁仲善各將兵一萬駐清河未行遼陽破仲善陣亡世祿弼俱負重傷潰圍出世祿以傷重命立功自効尋用為固原總兵官六年以軍政拾遺

罷明年寧錦告警命率家丁赴關聽調旋命出守前屯  
甫至今以故官鎮山海崇禎元年移鎮宣府明年冬京  
師戒嚴率師入衛兵再潰世祿被創部卒剽民間奔還  
鎮事聞當重坐以勤王先至減死戍邊九年八月京師  
被兵率子弟從軍叙功免戍還籍廷臣多推薦卒不復  
用十六年李自成圍榆林世祿與子拱極固守新添門  
城陷父子被執俱不屈死拱極歷官叅將常從總兵尤  
世祿破賊河曲有功九年冬任山海總兵官尋謝病歸

後以廷臣薦應詔入都與王洪王世欽尤世威台對中  
左門未用遣歸卒與父同死

劉國能延安人始與李自成張獻忠輩同為盜自號闖  
塌天崇禎三年大亂陝西已渡河而東寇山西轉掠畿  
南河北六年冬入河南遂由內鄉浙川犯湖廣鄭襄破  
數縣明年正月入西川陷夔州折而東入鄖陽境為總  
督陳奇瑜所蹙走漢南同困車箱峽已得出復大亂陝  
西再入河南躡江北官軍逼之與整齊王屯商雒山間

九年復偕閻王蝎子塊等由鄖襄趨興安漢中總督洪承疇奔命不暇尋南走荆襄與總兵秦翼明數戰其冬與蝎子塊等十七營窺潼關巡撫孫傳庭扼之引而南明年聞馬光玉等將犯蘄黃率衆會之直趨江北官軍數道邀擊乃不敢東還走黃陂入木蘭山轉寇河南敗叅將李春貴兵將迫開封詔諸將發兵援乃南走黃麻當是時總理熊文燦新至賊憚之見其下招降令頗有欲歸正者國能先與張獻忠有隙慮為所并後又與左

良玉戰敗乃以十一年正月四日率先就撫於隨州賴  
首文燦前曰愚民陷不義且十載賴公湔洗更生願悉  
衆入軍籍身隸麾下盡死力文燦大喜慰撫之署為守  
備令隸良玉軍國能受約束無異志已而張獻忠羅汝  
才亦降皆據邑自固獨國能從軍征戰數有功明年二  
月從良玉勤王有詔還討賊獎厲之命兵部授官錄其  
部下將士曰獻忠能立功視此遂授國能副總兵四月  
良玉會師南陽擊李萬慶國能分擊賊潰奔遂招萬慶

降其秋獻忠汝才並反文燦遣國能率萬慶兵會討遂  
並守鄖陽既而李自成擾河南復移守葉縣初國能為  
盜時與自成汝才輩結為兄弟及國能歸正自成輩深  
恨之十四年九月圍其城四面力攻國能不能支城遂  
陷被執賊猶好謂之曰若我故人也何不降國能瞋目  
罵曰我初與若同為賊今則王臣也何故降賊遂殺之  
事聞贈左都督特進榮祿大夫建祠李萬慶延安人崇  
禎初與張獻忠羅汝才等並反賊中所稱射塌天者是



也起陝西蔓山西畿南河北渡河殘河南出沒湖廣四  
川還趨鄖陽入興安困於車箱峽出險益大肆八年春  
賊七十二營會營陽議分兵隨所向令萬慶及許可變  
助馬進忠橫天王西當陝兵已而諸路之賊盡萃於陝  
總兵洪承疇彌歲不能定益恣出沒於河南湖廣凡十  
五家迨十一年春國能獻忠降萬慶等大譟而去改稱  
十三家勢頗衰而文燦擁兵德安不敢擊萬慶等復大  
振李自成向關中萬慶及馬光王馬進忠羅汝才惠登

相賀一龍蘭養成順天王順義王九家最著八月進忠  
光王大挫於潼關九月鄭襄賊又大敗於雙溝汝才率  
九營走均州萬慶率三營走光固十一月汝才亦降自  
成大敗關內勢益衰惟萬慶光玉一龍順天王最勁  
而萬慶得馬士秀杜應金所劫左良玉賄富且強營麻  
城徙信陽十二年正月戰敗徙應山德安會光玉進忠  
等皆大敗進忠懼而降而順天王已死一龍養成伏深  
山登相遠掠秦蜀萬慶勢益孤文燦檄良玉擊之唐縣

姚梁分三營肄賊逐入三山裨將王修政趨利戰死文  
燦收二營卒令良玉蹙之內鄉萬慶等在赤眉城四平  
岡依山結壘請降良玉慮其詐謀之文燦益調諸將陳  
永福羅武金聲桓之兵會於賈宋大勦萬慶及光玉可  
變副將國能亦至由張家林七里河分擊賊大奔良玉  
遣國能以二十騎往偵且諭萬慶降萬慶馳見輸情國  
能遂執許州叛黨于汝虎以降處內鄉城下者四千人  
士秀應金見進忠萬慶降而懼復來歸有劉喜才者夜

取順義王首以獻餘黨推可變為主與胡可受皆降自  
是羣盜大衰至五月獻忠復叛汝才率其黨九營應之  
復大熾而萬慶進忠以徒衆既散無二心萬慶願從征  
自效比國能給餉遂授為副總兵與國能守鄖陽獻忠  
等方大亂蜀中鄖境得無事十四年獻忠突陷襄陽鄖  
守如故明年正月總督汪喬年討賊以萬慶從至襄城  
軍潰入城賊攻圍之固守五日城陷喬年死萬慶亦不  
屈死事聞贈都督同知榮祿大夫立祠襄城

贊曰明至末季流寇蔓延國勢坐困雖有奮威禦敵之  
臣而兵孱餉絀徒使賊乘其敝潰陷相屬無救亂亡如  
艾萬年等之捐軀盡節其可悲者矣此非其勇不具畧  
不嫻也兵力耗頓加以統馭失宜應援不及求無敗衄  
得乎

明史卷二百六十九

欽定四庫全書

明史卷二百六十九考證

艾萬年傳點燈入於山西萬年從文詔連敗之

臣方

煒按點燈子即趙勝初起於清澗之解家溝奔突韓城宜雒開秦撫練國事以四年三月敗之於中部四月內屢克之於邵陽韓村上峪口俘斬一千六百有奇賊乃於七月夜半渡河入晉見綏寇紀略謹附識

艾萬年傳從叅政樊一衡討平不沾泥

臣方煒按不

沾泥原名張存蓋以是年四月攻米脂葭川一蘄與  
萬年及總兵王承恩等率三千人壓其巢命孫守法  
遮絕河津賊逃至舍峪為馬科所躡過河守法親擒  
之見明紀事本末謹識

艾萬年傳萬年國鎮力戰不支皆戰歿  
臣方煒按艾  
萬年及柳國鎮

賜謚俱另載卷末謹識

李卑傳混天猴陷宜君鄜州  
臣方煒按是時混天猴



與上天猴掠河西道郭允登所解餉十萬七千金於  
甘泉戕允登及知縣郭允固上天猴旋伏法而混天  
猴既叛遂連陷諸邑見綏寇紀略謹附識

李卑傳會王自用陷遼州

臣

方煒按自用即紫金樑

賊王嘉允餘黨也見綏寇紀略謹附識

李卑傳臨洮總兵曹文詔改大同命卑代署其事

臣

方煒按卑署臨洮總兵從職方郎李繼貞之薦也見

崇禎長編謹附識

湯九州傳九年二月賊走登封石陽關與伊嵩賊合

臣方煒按是年二月賊友密縣不利走登封王進忠周維壩敗之於郛城鎮遂奔石陽關見綏寇紀略謹附識

湯九州傳勢不敵夜移營為賊所乘遂戰歿  
臣方煒按湯九州及楊正芳張上選楊世恩羅安邦

賜謚俱另載卷末謹識

湯九州傳從孫文瓊伏闕三上書請卹不報文瓊後亦

殉難 臣方燁按湯文瓊

賜祀忠義祠謹識

湯九州傳楊世恩附祖寬大破賊滁州世恩從盧象昇  
馳至復大破之 臣方燁按是時滁州被圍象昇在

西沙河聞警遣祖寬羅岱祖克勇乘夜夜馳平明抵  
滁大破之象昇自引世恩從定遠至淮撫朱大典亦  
引兵至賊大破靡俘斬無算圍遂解見明紀事本末

謹附識

陳于王傳于王手執大刀左右殺賊重傷力竭北面叩

頭自刎死閱十日面色如生

臣

方煒按陳于王及

包文達程龍潘可大詹兆鵬莫是驎唐世龍王宏猷

賜謚俱另載卷末謹識

陳于王傳陸王猷殺賊過當賊鬻分其肉死莫是驎唐

世龍及千戶王定遠皆力戰死

臣

方煒按陸王猷

王定遠

賜祀忠義祠謹識

陳于王傳餘廕贈有差

臣

方煒按是時贈詹兆鵬等

十二員為懷遠將軍署指揮同知見綏寇紀略傳未  
詳載謹附考

侯良柱傳總督洪承疇大舉討賊令良柱扼賊入川路

臣

方煒按是時承疇疏言副將張令叅將譚大孝

兵九千臣未敢遠調聽蜀撫王維章總兵侯良柱率  
之親赴秦楚交界處相機調度見綏寇紀略謹附識  
侯良柱傳十月李自成過天星混天星陷寧羌分三道

入寇

臣

方燁按是時賊一軍攻七盤一軍入廣元

一軍向白水所謂三道入寇也迨廣元破連陷昭化

劍門劍州梓潼又分其軍一往錦州一往鹽亭一往

江油其由江油入者徑薄成都見明紀事本末謹附

識

侯良柱傳良柱急拒戰於綿州衆寡不敵陣亡

臣方

燁按侯良柱

賜謚另載卷末謹識

張令傳獻忠等悉奔興安為令所扼不得入漢中乃轉

寇夔州十三年二月大敗瑪瑙山

臣

方煒按獻忠

瑪瑙山之敗在二月七日叅將張應元江之鳳乘勝  
逐北十六日及之於水右壩斬馘九百賊遂走全溪  
見明紀事本末謹附識

張令傳令力戰中矢死

臣

方煒按張令

賜謚另載卷末謹識

猛如虎傳坐事落職發邊外方立功

臣

方煒按如虎

所坐何事明紀事本末諸書皆無可考謹識

猛如虎傳元吉應元營安岳城下以扼其歸路

臣方

煒按是年十二月嗣昌駐重慶戒期追兵三檄賀人  
龍不奉命而左良玉亦怨望萬元吉言軍心不一未  
可戰欲令前軍躡戒後軍繼之中軍從間道出梓潼  
扼歸路嗣昌不聽見綏寇紀略謹附識

猛如虎傳乃收殘卒從嗣昌下荊州

臣

方煒按嗣昌

在雲陽聞敗頓足曰悔不用萬叅軍之言遂退回重



慶順流歸楚賊已席卷出川西焚新開驛置而楚蜀  
消息中斷矣見明紀事本末謹附識

猛如虎傳祚及分守參議艾毓初南陽知縣姚運熙並  
死之

臣

方煒按猛如虎及劉士杰郭開猛先捷劉

光祚艾毓初姚運熙

賜謚俱另載卷末謹識

猛如虎傳劉光祚附賊渠賀宗漢號活地草者見其黨  
劉浩然高加計破滅偽乞降光祚伏兵斬之

臣

方

煒按劉浩然即鄉里人也如虎及虎大威麾下安集  
掾龔能善用謀以間賊賊遂內自擬持浩然首以降  
見綏寇紀略謹附識

虎大威傳從總兵尤世祿擊王嘉允於河曲力戰被傷  
臣方煒按是時嘉允以三千人出掠方裕昆敗績  
於櫻桃鎮大威與尤勝隆皆負重傷見綏寇紀略謹  
附識

虎大威傳九月次新蔡抵孟家莊將斬秦帥賀人龍軍

先潰大威軍亦潰遂奔沈邱

臣

方煒按宗龍文岳

以九月四日次新蔡命軍中起浮橋期翼日渡河自成亦過河窺汝寧相與值二督夜召諸將謀邀擊遲明賊過且盡師至孟家莊諸將解鞍休士賊突出人龍奔李國奇初接戰亦奔與大威同避於沈邱二督自以親軍與賊持文岳是夜奔陳州宗龍被圍十餘日突圍出被執死之見綏寇紀畧謹附識

虎大威傳出攻賊寨中礮死

臣

方煒按虎大威

賜謚另載卷末謹識

孫應元傳擊賊羅山力戰孤軍無援遂陣歿

臣方煒

按孫應元

賜謚另載卷末謹識

姜名武傳被執大罵為賊磔死

臣方煒按姜名武及

王來聘甄奇傑鄧祖禹

賜謚另載卷末謹識

尤世威傳世威世欽世國昌齡並被執縛

臣方煒按

尤世威及都任惠顯劉廷傑廷夔王世欽世國王學  
書李昌齡尤世祿尤翟文尤岱

賜謚俱另載卷末謹識

尤世威傳

王世欽附

厯山海左部總兵官謝病去

臣方煒

按世欽始官都督僉事與蕭如董白兆慶分練三大  
營軍遷都督同知孫承宗設山海三大將用為左部  
總兵官言官欲去承宗先擊世欽遂謝病去見陝西  
通志謹附識

尤世威傳

尤世祿附

世祿為寧夏總兵官累著戰功

臣方

煒按世祿於三年冬由保定總兵調山西擊王嘉允於河曲四年十月稱病五年冬總督張宗衡起之與李卑賀人龍同援遼州復之八年闖塌天整齊王等躡江北為世祿所扼退屯商雒山中見綏寇紀略所謂屢著戰功指此謹附識

侯世祿傳父子被執俱不屈死

臣

方煒按侯世祿及

子拱極

賜謚俱另載卷末謹識

劉國能傳尋南走荆襄與總兵秦翼明數戰

臣方煒

按是時翼明自言以三千餘騎與闖塌天等賊十萬戰於豐陽界山均州官山觀音闢七星店真武山大數十戰雖未嘗敗北賊益固終不能破見綏寇紀略謹附識

劉國能傳國能瞋目罵曰我初與若同為賊今則王臣也何故降賊遂殺之

臣方煒按劉國能李萬慶

賜謚俱另載卷末謹識

劉國能傳

李萬  
度附

八月進忠光王大挫於潼關

臣

方煒

按是年八月進忠光王毆宛雒之衆思入潼關傳庭  
與承疇擊賊邠寧間乃辭承疇出關嚴陣擊之賊拔  
營還走九月熊文燦遣左良玉陳洪範龍在田大破  
賊於雙溝營斬首二千餘自文燦出師以雙溝之捷  
為第一見綏寇紀略謹附識



欽定四庫全書

附明史卷二百六十九考證後

乾隆四十一年

賜謚諸臣

尤世威 專謚忠剛

艾萬年 湯九州 潘可大 侯良柱 張令

猛如虎 劉光祚 虎大威 孫應元 姜名武

鄧祖禹 都任 惠顯 劉廷傑 劉廷夔

王世欽 李昌齡 侯世祿

以上通謚忠烈

艾毓初 通謚忠節

柳國鎮 楊正芳 張上選 楊世恩 陳于王

包文達 程龍 詹兆鵬 莫是驊 唐世龍

王弘猷 劉士杰 郭開 猛先捷 王來聘

王世國 甄奇傑 王學書 尤世祿 尤翟文

尤岱 侯拱極 劉國能 李萬慶

以上通謚烈愍

羅安邦 姚運熙

以上通謚節愍



欽定四庫全書薈要卷六千八百六十三 史部

明史卷二百七十

大學士張建玉等奉 敕修

列傳第一百五十八

馬世龍

楊肇基

賀虎臣

沈有容

張可大

弟可仕

魯 欽

子宗文

秦良玉

龍在田

馬世龍字蒼元寧夏人由世職舉武會試歷宣府遊擊  
天啟二年擢永平副總兵署兵部孫承宗奇其才薦授  
署都督僉事充三屯營總兵官承宗出鎮薦為山海總  
兵俾領中部調總兵王世欽尤世祿分領南北二部明  
年正月賜尚方劍實授府銜承宗為築壇拜大將代行  
授鉞禮軍馬錢穀盡屬之尋定分地世龍居中駐衛城  
世欽南海世祿北山並受世龍節制兵各萬五千人世  
龍感承宗知己頗盡力與承宗定計出守關外諸城四

年偕巡撫喻安性及袁崇煥東巡廣寧又與崇煥世欽航海抵蓋套相度形勢而還敘勞加右都督當是時承宗統士馬十餘萬用將校數百人歲費軍儲數百萬諸有求於承宗者率因世龍不得則大恚而世龍貌偉中實怯忌承宗者多擊世龍以撼之承宗抗辯於朝曰人謂其貪淫黷削臣敢以百口保其必無帝以承宗故不問五年九月世龍誤信降人劉伯彊言遣前鋒副將魯之甲叅將李承先率師襲取耀州敗沒言官交章劾奏

嚴旨切責令戴罪圖功時魏忠賢方以清君側疑承宗其黨攻世龍者并及承宗承宗不安其位去以兵部尚書高第來代職方主事徐日久者先佐第撓遼事及從第贊畫力攻世龍世龍陰結忠賢反削日久籍其冬世龍亦謝病去崇禎元年王在晉為尚書世龍上疏極論其罪有詔逮世龍久不至在晉罷始詣獄二年冬都城戒嚴刑部尚書喬允升薦世龍才詔圖功自贖會祖大壽師潰京師大震承宗再起督師以便宜遣世龍馳諭



大壽聽命及滿桂戰死遂令世龍代為總理賜尚方劍  
盡統諸鎮援師三年三月進左都督時遵化永平遷安  
灤州四城失守已三月承宗大壽隔關門與世龍諸軍  
聲息斷絕帝急詔四方兵勤王昌平尤世威薊鎮楊肇  
基保定曹鳴雷山海宋偉山西王國樑固原楊麒延綏  
吳自勉臨洮王承恩寧夏尤世祿甘肅楊嘉謨所將皆  
諸邊銳卒內地則山東河南南都湖廣浙江江西福建  
四川諸軍亦先後至并壁薊門觀望不進給事中張第

元上言世龍在關數載績效無聞非若衛霍之儔功名  
足以服人也諸帥宿將非世龍偏裨欲驅策節制誰能  
甘之師老財匱銳氣日消延及夏秋將有不可言者帝  
以世龍方規進取不納其言時大壽於五月十日薄瀼  
州明日世龍等以師會又明日復其城十三日遊擊靳  
國臣復遷安明日副將何可綱復永平又二日別將復  
遵化閱五月四城始復論功大壽最世祿次之世龍加  
太子少保蔭本衛世千戶八月復謝病歸六年五月察

罕呼爾敦圖合套寇犯寧夏總兵賀虎臣戰歿詔起世  
龍代之世龍生長寧夏習其形勢大修戰備明年正月  
二部入犯遣參將卜應第大破之斬首二百有奇踰月套  
寇犯賀蘭山世龍遣降丁潛入其營誡其長薩爾謙斬  
級如前未幾察罕部大舉入寇世龍遣副將婁光先等  
分五道伏要害而已中道待之夾擊斬首八百有奇巡撫  
王振奇亦斬三百餘級寇復犯河西王泉宮世龍復邀  
斬五百餘其年七月犯棗園堡世龍又大敗之俘斬一

千有奇世龍半歲中屢奏大捷威名震西塞無何卒於  
官年四十餘後論功贈太子太傅世錦衣僉事賜恤如  
制楊肇基沂州衛人起家世職積官至大同總兵天啟  
二年妖賊徐鴻儒反山東連陷鄆鉅野鄒滕嶧衆至數  
萬巡撫趙彥任都司楊國棟廖棟檄所部練民兵增諸  
要地守卒時肇基方家居彥因即家薦起之為山東總  
兵官討賊未至棟及國棟等攻鄒兵潰遊擊張榜戰死  
彥方視師兗州遇賊肇基至急迎戰而令國棟及棟夾

擊大敗之橫河時賊精銳聚鄒滕中道肇基令遊兵綴賊鄒城而以大軍擊賊黃陰紀王城大敗賊蹙而殪之  
嶧山遂圍鄒國棟等亦先後收復鄆鉅野嶧滕諸縣又大破之於沙河乃築長圍攻鄒圍三月賊食盡其黨出降遂禽鴻儒獻俘磔於市賊平肇基由署都督僉事進右都督廕本衛世千戶尋代沈有容鎮登萊改延綏以擊套寇功進左都督廕錦衣千戶屢加太子太保崇禎元年移薊鎮西協二年冬

大清兵克三屯營肇基乘間收復困守數月卒全孤城  
廕錦衣世千戶已錄恢復四城功加太子太師改廕錦  
衣僉事明年卒官子御蕃見徐從治傳

賀虎臣保定人天啟初歷天津海防遊擊登萊參將移  
兗州六年遷延綏副總兵河套寇大舉入犯從帥楊肇  
基協擊大破之加署都督僉事崇禎二年捕誅階州叛  
卒周大旺等擢總兵官鎮守寧夏關中賊大起王嘉允  
陷清水營殺遊擊李顯宗遂陷府谷其黨李老柴應之

嘯聚三千餘人攻合水總督楊鶴檄虎臣往討擊之盤  
谷俘馘六百有奇已擊斬慶陽賊渠劉六四年神一元  
陷保安延安告急延綏撫鎮皆東援陝西巡撫練國事  
檄虎臣及副將李卑援勦虎臣等遂進圍保安賊引河  
套數千騎挫虎臣軍會張應昌擊敗之賊衆棄城去虎  
臣等前後獲首功一千九百明年可天飛郝臨菴劉道  
江李都司再圍合水虎臣偕臨洮曹文詔甘肅楊嘉謨  
固原楊麒合擊大破賊甘泉之虎兕四斬首七百有奇

大因六年五月察罕呼爾敦圖合套寇五萬騎自清水橫城分道入守備姚之夔等不能禦沙井驛副將史開先臨河堡叅將張問政岳家樓守備趙訪皆潰逃寇遂進薄靈州虎臣急領千騎入守旋盡勒城中兵出擊次大沙井寇從漢伯堡突至虎臣軍未及布陳且衆寡不敵遂戰死子讚挾五十騎突重圍出事聞贈虎臣都督僉事賜祭葬世廕指揮僉事尋錄先後勦寇功再贈都督同知世廕錦衣副千戶讚勇敢有父風既承廕尋舉



武進士積官至京營副將崇禎十七年三月李自成薄  
京師京軍六大營分列城外皆不敢戰或棄甲降讚獨  
率部卒迎擊中矢死弟誠身長七尺美鬚髯為諸生以  
忠義自許兄誠襲副千戶早卒無子誠當襲以讓其弟  
詮及賊陷保定家人勸易衣遁叱曰吾忠臣子偷生而  
逃何以見先將軍地下遂偕妻女投井死

沈有容字士弘宣城人僉事寵之孫也幼走馬擊劍好  
兵畧舉萬曆七年武鄉試薊遼總督梁夢龍見而異之

用為昌平千總復受知總督張佳允調薊鎮東路轄南  
兵後營十二年秋朶顏長昂以三千騎犯劉家口有容  
夜半率健卒二十九人迎擊身中二矢斬首六級寇退  
乃還由是知名遼東巡撫顧養謙召隸麾下俾練火器  
十四年從李成梁出塞抵庫克穆稜斬馘多明年再出  
亦有功成梁攻北關有容陷陣馬再易再斃卒拔其城  
錄功世廕千戶遷都司僉書守浮屠谷從宋應昌援朝  
鮮乞歸日本封事壞福建巡撫金學曾欲用奇搗其穴

起有容守浯嶼銅山二十九年倭掠諸寨有容擊敗之  
踰月與銅山把總張萬紀敗倭彭山洋倭據東番有容  
守石湖謀盡殲之以二十一舟出海遇風存十四舟過  
彭湖與倭遇格殺數人縱火沈其六舟斬首十五級奪  
還男婦三百七十餘人倭遂去東番海上息肩者十年  
捷聞文武將吏悉敘功有容賚白金而已三十二年七  
月西洋紅毛番長韋麻郎駕三大艘至彭湖求互市稅  
使高家召之也有容白當事自請往諭見麻郎指陳利

害麻郎悟呼宋使者索還所賂宋金揚帆去改僉書浙  
江都司由浙江遊擊調天津遷溫處參將罷歸四十四  
年倭犯福建巡撫黃承元請特設水師起有容統之禽  
倭東沙尋招降巨寇袁進李忠散遣其衆泰昌元年遼  
事棘始設山東副總兵駐登州以命有容天啓改元遼  
瀋相繼覆熊廷弼建三方布置之議以陶朗先巡撫登  
萊而擢有容都督僉事充總兵官登萊遂為重鎮八月  
毛文龍有鎮江之捷詔有容統水師萬偕天津水師直

抵鎮江策應有容歎曰率一旅之師當方張之敵吾知  
兵不克濟也無何鎮江果失水師遂不進明年廣寧覆  
遼民走避諸島日望登師救援朗先下令敢渡一人者  
斬有容爭之立命數十艘往獲濟者數萬人時金復蓋  
三衛俱空無人有欲據守金州者有容言金州孤懸海  
外登州皮島俱遠隔大洋聲援不及不可守迨文龍取  
金州未幾復失四年有容以年老乞骸骨歸卒贈都督  
同知賜祭葬

張可大字觀甫應天人世襲南京羽林左衛千戶舉萬  
歷二十九年武會試授建昌守備遷浙江都司僉書分  
守瓜洲儀真江洋大盜斂迹稅監魯保死淮撫李三才  
令可大錄其貲保家餽重賄却不受葉向高赴召過儀  
見而異之曰此不特良將且良吏也遷劉河遊擊改廣  
東高肇叅將調浙江舟山奉命征黎與總兵王鳴鶴用  
黑番為導搗其巢黎乃滅舟山宋昌國城也居海中有  
七十二壘為浙江要害可大條上八議皆碩畫倭犯五

罩湖白沙港茶山潭頭連敗之加副總兵城久圯可大  
與副使蔡獻臣築之兩月工竣城內外田數千畝海潮  
害稼可大築碑蓄淡水遂為膏腴民稱曰張公碑天啓  
元年以都指揮使掌南京錦衣衛六年擢都督僉事僉  
書南京右府崇禎元年出為登萊總兵官會議裁登萊  
撫鎮乃命以總兵官視登州副總兵事而巡撫遂罷不  
設可大盡心海防親歷巡視圖沿海地形兵力強弱為  
海防圖說上之二年冬白蓮賊餘黨圍萊陽可大擊破

之焚其六砮斬偽國公二人圍遂解京師被兵可大入

衛守西直廣寧諸門明年以勤王功陞都督同知劉興  
治反東江遂奉詔還鎮已而四城並復朝議復設登萊  
巡撫以孫元化為之元化率關外八千人至強半皆遼  
人可大慮有變屢言於元化不聽四年七月錄前守城  
功進右都督十月僉書南京左府兼督池河浦口二軍  
登人泣留之未行而孔有德反吳橋東陷六城可大急  
往勦元化檄止之不聽次萊州遇元化復為所阻乃還



鎮歲將晏有德募薄城可大請擊之元化持撫議不許  
可大陳利害甚切元化期明歲元日發兵合擊至期元  
化兵不發明日合兵戰城東可大兵屢勝元化部卒皆  
遼人親黨多無鬪志其將張燾先走可大兵亦敗中軍  
管維城遊擊陳良謨守備盛洛姚士良皆戰死燾兵半  
降有德遣歸為內應元化開門納之可大諫不聽夜半  
賊至城遂陷可大時守水城撫膺大慟解所佩印付旗  
鼓間道走濟南上之還家辭母令弟可度子鹿徵奉母

航海趨天津而以佩劍付部將盡斬諸婢妾遂投環死  
事聞贈特進榮祿大夫太子少傅諡莊節賜祭葬予世  
廕建祠曰旌忠可大好學能詩敦節行有儒將風為南  
京錦衣時歐陽暉由刑部主事謫本衛知事嘗賦詩有  
陰霾國事非句揚州知府劉鐸書之扇贈一僧惡鐸者  
譖之魏忠賢暉鐸俱被逮可大約束旗尉捐奉助之卜  
室處其妻子其尚義類如此弟可仕字文峙以字行隱  
居博學嘗輯明布衣詩一百卷

魯欽長清人萬厯中厯山西副總兵天啟元年遷神機營左副將尋擢署都督僉事充保定總兵官奢崇明安邦彥並反貴州總兵張彥方在圍中而總理杜文煥稱病明年十月用欽代文煥命總川貴湖廣漢土軍刻期解圍未至圍已解欽馳赴貴陽三年正月巡撫王三善大敗於陸廣羣苗宋萬化何中尉等蠭起欽佐三善防勦率諸將禽中尉萬化遂進營紅崖紅崖者崇明敗走處也三善謀大舉深入欽及總兵官馬炯張彥方諸道

監司尹伸岳具仰向日升楊世賞各以兵從五戰斬首  
萬八千直抵大方四年正月三善敗歿於內莊欽等以  
殘卒還命戴罪辦賊都勻凱里土司者運道咽喉也邦  
彥結諸蠻困其城長官楊世蔚不能守總督蔡復一遣  
欽及總兵官劉超救之拔賊巖頭寨遂移師克平茶已  
而邦彥盡驅羅鬼結四十營於斑鳩灣後寨亘二十餘  
里分犯普定復一令欽與總兵官黃鉞分道禦之欽率  
部將張雲鵬劉志敏鄧玘等大敗賊汪家冲鉞及叅政

陸夢龍副使楊世賞亦大敗賊蔣義寨合追至河斬首  
千五百餘級搜山復斬六百餘級尹伸守普定亦敗賊  
兵與大兵會共剪水外逆苗邦彥勢窘渡河西奔欽鉞  
督諸將窮追夢龍等分駐三岔河岸為後勁前鋒雲鵬  
玘等深入織金先後斬首千餘級復一上其功言欽廉  
勇雖名總理權力不當一偏裨舊撫臣三善及諸監軍  
人人為大帥內莊失律欽不當獨任大帥罪臣至黔以  
諸道監軍兵盡屬欽每戰身先士卒欽敗可原勝足錄

當免其戴罪仍以功論從之明年正月欽等渡河還中  
伏敗死者數千人充為事官立功自贖自平越至興隆  
清平二衛苗二百餘寨盤踞其間以長田之天保阿秧  
為魁邦彥初反授二苗都督使通下六衛聲息是年春  
寇石阡餘慶監軍按察使來斯行咱阿秧使圖天保阿  
秧反以情告斯行乃誘斬阿秧議討天保會以疾去復  
一令貴陽同知周鴻圖代為監軍阿秧弟阿買與天保  
請兵邦彥復允讐復一以兵事屬鴻圖及欽而遣叅將

胡從儀楊明楷等佐之欽等三道進大戰米墩山生禽  
天保及阿買先後斬賊魁五十四人獲首功二千三百  
五十破焚百七十四寨盛夏興師將士冒暑雨衝嵐瘴  
劇寇盡除土人謂二百年所未有復一既奏功未報而  
卒監軍御史傅宗龍復以為言乃命欽總理如故鴻圖  
授平越知府六年三月邦彥復大舉入寇欽禦之河上  
連戰數日殺傷相當夜半賊直逼欽壘將士逃竄欽遂  
自刎諸營盡潰賊勢復張欽勇敢善戰為西南大將之

冠莊烈帝嗣立贈少保左都督世廕指揮僉事賜祭葬  
建嗣曰旌忠子宗文承廕崇禎中以薊鎮副總兵為總  
督吳阿衡中軍十一年冬牆子嶺失事與阿衡並力戰  
死

秦良玉忠州人嫁石砭宣撫使馬千乘萬曆二十七年  
千乘以三千人從征播州良玉別統精卒五百裹糧自  
隨與副將周國柱扼賊鄧坎明年正月二日賊乘官軍  
宴夜襲良玉夫婦首擊敗之追入賊境連破金筑等七



寨已偕酉陽諸軍直取桑木關大敗賊衆為南川路戰  
功第一賊平良玉不言功其後千乘為部民所訟瘐死  
雲陽獄良玉代領其職良玉為人饒膽智善騎射兼通  
詞翰儀度嫺雅而馭下嚴峻每行軍發令戎伍肅然所  
部號白桿兵為遠近所憚泰昌時徵其兵援遼良玉遣  
兄邦屏弟民屏先以數千人往朝命賜良玉三品服授  
邦屏都司僉書民屏守備天啟元年邦屏渡渾河戰死  
民屏突圍出良玉自統精卒三千赴之所過秋毫無犯

詔加二品服即予封誥子祥麟授指揮使良玉陳邦屏  
死狀請優卹因言臣自征播以來所建之功不滿讒妬  
口目錦高張忠誠孰表帝優詔報之兵部尚書張鶴鳴  
言渾河血戰首功數千寶石砭酉陽二土司功邦屏既  
歿良玉即遣使入都製冬衣一千五百分給殘卒而身  
督精兵三千抵榆關上急公家難下復私門仇氣甚壯  
宜錄邦屏子進民屏官乃贈邦屏都督僉事錫世廕與  
陳策等合祠民屏進都司僉書部議再徵兵二千良玉

與民屏馳還抵家甫一日而奢崇明黨樊龍反重慶齎金帛結援良玉斬其使即發兵率民屏及邦屏子翼明拱明溯流西上度渝城奄至重慶南坪關扼賊歸路伏兵襲兩河焚其舟分兵守忠州馳檄夔州令急防瞿塘上下賊出戰即敗歸良玉上其狀擢民屏參將翼明拱明守備已而奢崇明圍成都急巡撫朱燮元檄良玉討時諸土司皆貪賊賂逗遛不進獨良玉鼓行而西收新都長驅抵成都賊遂解圍去良玉乃還軍攻二郎關民

屏先登已克佛圖關復重慶良玉初舉兵即以疏聞命  
封夫人錫誥命至是復授都督僉事充總兵官命祥麟  
為宣慰使民屏進副總兵翼明拱明進參將良玉益感  
奮先後攻克紅崖墩觀音寺青山墩諸大巢蜀賊底定  
復以援貴州功數賚金幣三年六月良玉上言臣率翼  
明拱明提兵裹糧累奏紅崖墩諸捷乃行間諸將未覩  
賊面攘臂誇張及乎對壘聞風先遁敗於賊者唯恐人  
之勝怯於賊者唯恐人之強如總兵李維新渡河一戰

敗衄歸營反閉門拒臣不容一見以六尺軀鬚眉男子  
忌一巾幘婦人靜夜思之亦當愧死帝優詔報之命文  
武大吏皆以禮待不得疑忌是年民屏從巡撫王三善  
抵陸廣兵敗先遁其冬從戰大方屢捷明年正月退師  
賊來襲戰死二子佐明祚明得脫皆重傷良玉請卹贈  
都督同知立祠賜祭官二子而是時翼明拱明皆進官  
至副總兵崇禎三年永平四城失守良玉與翼明奉詔  
勤王出家財濟餉駐烈帝優詔褒美召見平臺賜良玉

綵幣羊酒賦四詩旌其功會四城復乃命良王歸而翼  
明駐近畿明年築大凌河城翼明以萬人護築城成命  
撤兵還鎮七年流賊陷河南加翼明總兵官督軍赴討  
明年鄧玘死以所部皆蜀人命翼明將之連破賊於青  
崖河吳家堰袁家坪扼賊走鄖西路翼明性恇怯部將  
連敗不以實聞革都督銜貶二秩辦賊已從盧象昇逐  
賊穀城賊走均州翼明敗之青石鋪賊入山自保翼明  
攻破之連破賊界山三道河花園溝禽黑煞神飛山虎

賊出沒鄖襄間撫治鄖陽苗胙土遣使招降翼明贊其  
事為賊所紿卒不降翼明胙土皆被劾已而賊犯襄陽  
翼明連戰得利屯兵廟灘以扼漢江之淺而羅汝才劉  
國能自深水以渡遂大擾蘄黃間帝以鄖襄屬邑盡殘  
罷胙土切責翼明尋亦被劾解官而良玉自京師還不  
復援勦專辦蜀賊七年二月賊陷夔州圍太平良玉至  
乃走十三年扼羅汝才於巫山汝才犯夔州良玉師至  
乃去已邀之馬家寨斬首六百追敗之留馬垓斬其魁

東山虎復合他將大敗之譚家坪北平又破之仙寺嶺  
良王奪汝才大纛禽其渠副塌天賊勢漸衰當是時督  
師楊嗣昌盡驅賊入川川撫邵捷春提弱卒二萬守重  
慶所倚惟良王及張令二軍綿州知州陸遜之罷官歸  
捷春使按營壘見良王軍整心異之良王為置酒語遜  
之曰邵公不知兵吾一婦人受國恩誼應死獨恨與邵  
公同死耳遜之問故良王曰邵公移我自近去所駐重  
慶僅三四十里而遣張令守黃泥窪殊失地利賊據歸



平萬山巔俯瞰吾營鐵騎建瓴下張令必破令破及我  
我敗尚能救重慶急乎且督師以蜀為壑無愚智知之  
邵公不以此時爭山奪險令賊無敢即我而坐以設防  
此敗道也遜之深然之已而捷春移營大昌監軍萬元  
吉亦進屯巫山與相應援其年十月張獻忠連破官軍  
於觀音巖三黃嶺遂從上馬渡過軍良玉偕張令急扼  
之竹筍坪挫其鋒會令為賊所殪良玉趨救不克轉鬪  
復敗所部三萬人畧盡乃單騎見捷春請曰事急矣盡

發吾溪峒卒可得二萬我自廩其半半餼之官猶足辦  
賊捷春見嗣昌與已左而倉無見糧謝其計不用良玉  
乃歎息歸時搖黃十三家賊橫蜀中有秦繼勲者良玉  
族人也為賊耳目被禽殺獄卒遁去良玉捕執以獻無  
脫者張獻忠盡陷楚地將復入蜀良玉圖全蜀形勢上  
之巡撫陳士奇請益兵守十三隘士奇不能用復上之  
巡按劉之勃之勃許之而無兵可發十七年春獻忠遂  
長驅犯夔州良玉馳援衆寡不敵潰及全蜀盡陷良玉

慷慨語其衆曰吾兄弟二人皆死王事吾以一孱婦蒙  
國恩二十年今不幸至此其敢以餘年事逆賊哉悉召  
所部約曰有從賊者族無赦乃分兵守四境賊遍招土  
司獨無敢至石砬者後獻忠死良王竟以壽終翼明既  
罷崇禎十六年冬起四川總兵官道梗命不達而拱明  
值普名聲之亂與賊鬪死贈卹如制

龍在田石屏州土官舍人也天啓二年雲南賊安效良  
張世臣等爲亂在田與阿迷普名聲武定吾必奎等征

討數有功得為土守備新平賊剽石屏安效良攻霑益  
在田俱破走之巡撫閔洪學上其功擢坐營都司崇禎  
二年與必奎收復烏撒八年流賊犯鳳陽詔徵雲南土  
兵在田率所部應詔擊賊湖廣河南頻有功擢副總兵  
總理盧象昇檄討襄陽賊至則象昇已奉詔勤王命屬  
熊文燦十年三月擊禽大盜郭三海十一年九月大破  
賀一龍李萬慶於雙溝進都督同知明年三月大破賊  
固始斬首三千五百有奇張獻忠之叛也文燦命在田

駐穀城遇賊東突諸將多忌在田讒言日興及文燦被  
逮在田亦罷歸還至貴州擊平叛賊安隴壁十五年夏  
中原盜益熾在田上疏曰臣以石屏世弁因流氛震陵  
奮激國難捐貲募精卒九千五百戰象四戰馬二千八  
楚豫破賊賊不敢窺江北陵寢滇兵有力焉五載捷二  
十有八忌口中阻逼臣病歸自臣罷親藩辱名城屢陷  
臣妄謂討寇必須南兵蓋諸將所統多烏合遇寇即逃  
乏餉即譟滇兵萬里長驅家人父子同志非若他軍易

潰也且一歲中秋冬氣涼賊得馳騁春夏即入山避暑  
養銳而出故其氣益盛夫平原戰既不勝山蹊又莫敢  
攖師老財殫蕩平何日滇兵輕走遠跳善搜山臣願整  
萬衆力掃秦楚豫皖諸寇不滅不止望速給行糧沿途  
接濟臣誓捐軀報國言而不效甘伏斧鑕帝壯之下兵  
部議寢不行踰二載乙酉八月吾必奎叛黔國公沐天  
波檄在田及寧州土知州祿永命協討擊禽之未幾沙  
定洲作亂據雲南府在田不敢擊明年定洲攻在田不

下移攻寧州尋陷嵒峨在田走大理又明年孫可望等  
至貴州在田說令攻定洲定洲迄破滅在田歸卒於家  
贊曰馬世龍等值邊陲多事奮其勇畧著績戎行或捐  
軀力戰身膏原野可謂無忝爪牙之任矣夫摧鋒陷敵  
宿將猶難而秦良玉一土舍婦人提兵裹糧崎嶇轉鬪  
其急公赴義有足多者彼仗鉞臨戎縮朒觀望者視此  
能無媿乎

明史卷二百七十終



欽定四庫全書

明史卷二百七十考證

馬世龍傳賜尚方劍

臣

黃壽齡按賜世龍尚方劍緣

孫承宗請也事詳明熹宗實錄謹識

賀虎臣傳熊廷弼建三方布置之議

臣

黃壽齡按熊

廷弼傳廷弼建三方布置之議緣毛文龍有鎮江之捷之故是以叙鎮江之捷在前布置之議在後與傳所載互異謹識

張可大傳條上八議

臣黃壽齡按八議傳未詳載他

書亦無可考謹識

張可大傳歐陽暉由刑部主事謫本衛知事

臣黃壽

齡按歐陽暉由主事謫知事傳未詳何事他書亦無

可考謹識

龍在田傳諸將多忌在田讒言日興

臣黃壽齡按讒

言日興傳未詳所言何事他書亦無可考至文燦被

逮事詳文燦本傳謹識

欽定四庫全書

附明史卷二百七十考證後

乾隆四十一年

賜謚諸臣

賀虎臣 通謚忠烈

賀讚 通謚忠節

魯宗文 通謚節愍

吳阿衡 通謚烈愍



欽定四庫全書薈要卷六千八百六十四史部

明史卷二百七十一

大學士張建玉等奉 敕修

列傳第一百五十九

賀世賢 尤世功

童仲揆 陳策 周敦吉 等 張神武等

羅一貫 劉渠 祁秉忠

滿桂 孫祖壽

趙率教 朱國彥

官惟賢

何可綱

黃龍

金日觀 楚繼功等

賀世賢榆林衛人少為廝養後從軍積功至瀋陽遊擊  
遷義州參將萬厯四十六年七月清河被圍副將鄒儲  
賢固守城破率親丁鏖戰城南與參將張旆俱死部將  
二十人兵民萬餘殲焉世賢駐蹕陽聞變疾馳出塞得  
首功百五十有四級進副總兵明年楊鎬四路出師世  
賢副李如柏出清河劉綎深入中伏勸如柏往救不從  
綎遂覆歿尋擢都督僉事充總兵官駐虎皮驛鐵嶺被

圍世賢馳援城已破邀獲首功百餘級泰昌元年九月  
連戰灰山撫安堡獲首功二百有奇當是時四方宿將  
鱗集遼左率縮朒不敢戰獨世賢數角鬪有功同列多  
忌之移鎮瀋陽經畧袁應泰下納降令廣寧總兵李光  
榮疑世賢所納多以狀聞巡撫薛國用亦奏三可慮兵  
部尚書崔景榮請拒勿納而置已納於他所然世賢所  
納卒不可散同列遂謗其有異志天啟元年三月我  
大清以重兵薄瀋陽世賢及總兵尤世功掘塹濬壕樹

大木為柵列楯車火器木石環城設兵守城法甚具

大清先以數十騎來偵世功兵躡之殺四人世賢勇而輕嗜酒旦日飲酒率親丁千出城逆擊期盡敵而反

大清兵佯敗世賢乘銳進倏精騎四合世賢戰且却抵西門身被十四矢城中聞世賢敗各鳥獸竄而降丁復叛斷城外弔橋或勸世賢走遼陽曰吾為大將不能存城何面目見袁經畧乎揮鐵鞭馳突圍中擊殺數人中矢墜馬而死世功引兵援亦戰死世功亦榆林人萬厯



中舉武鄉試歷瀋陽遊擊張承蔭之敗也世功脫歸坐  
褫職經畧楊鎬言其身負重傷才堪策勵乃補武精營  
遊擊鎬四路出師世功隸李如柏麾下得全尋以副總  
兵守瀋陽熊廷弼代鎬愛其才與副將朱萬良並倚任  
廷弼罷袁應泰代議三路出師用為總兵官未行而瀋  
陽被兵死於戰贈少保左都督增世蔭三級再蔭指揮  
僉事世襲賜祭葬建祠曰愍忠世賢既歿或疑其叛降  
恤典故不及四川副使車樸為訟冤格衆議不果

童仲揆南京人舉武會試歷都指揮掌四川都司萬厯末擢副總兵督川兵援遼與同官陳策並充援勦總兵官熹宗初立經畧袁應泰招蒙古諸部處之遼潘二城仲揆力諫不聽明年天啟改元應泰欲城清河撫順議三路出師用大將十人各將兵萬餘仲揆策當其二未行而

大清兵已逼瀋陽兩人馳救次渾河遊擊周敦吉曰事急矣請直抵瀋陽與城中兵夾擊可以成功已聞瀋陽

陷諸將皆憤曰我輩不能救潘在此三年何為敦吉固  
請與石砮都司秦邦屏先渡河營橋北仲揆策及副將  
戚金參將張名世統浙兵三千營橋南邦屏結陣未就  
大清兵來攻却復前者三諸軍遂敗敦吉邦屏及參將  
吳文傑守備雷安民等皆死他將走入浙兵營被圍數  
匝副將朱萬良姜弼不救及圍急始前一戰即敗走  
大清兵盡銳攻浙營營中用火器多殺傷火藥盡短兵  
接遂大潰策先戰死仲揆將奔金止之乃還兵鬪力盡

矢竭揮刀殺十七人

大清兵萬矢齊發仲揆與金名世及都司袁見龍鄧起龍等並死馬萬良既遁經畧將斬之乞勦罪自効及遼陽被攻果陷陣死自遼左用兵將士率望風奔潰獨此以萬餘人當數萬衆雖力絀而覆時咸壯之事聞贈策少保左都督增世廕三級再廕本衛指揮僉事世襲賜祭葬建祠曰愍忠仲揆贈都督同知增世廕三級祠祀金起龍贈都督僉事增世廕三級附祀名世先有罪繫

獄尚書薛三才薦其善火器命從征立功文傑亦先禡  
職及死並得復官贈三級增世廕二級見龍等皆予贈  
廕他副將至把總戰死者百二十餘人贈廕有差敦吉  
先為四川永寧參將永寧宣撫奢效忠卒于崇明幼其  
妻奢世統與妾奢世續爭印相攻者十餘年後崇明襲  
職世續猶匿印不與都司張神武與敦吉謀盡掠其積  
聚子女禽世續以歸其部目閻宗傳怒以求主母為名  
大掠永寧赤水普市麾泥數百里成邱墟事聞敦吉神

武並論死遼東告警命敦吉從軍自効及是鏖戰死贈  
卹如制神武新建人萬厯中舉武會試第一授四川都  
司僉書既論死遼左兵興用經畧袁應泰薦詔諭從征  
立功神武率親丁二百四十餘疾馳至廣寧會遼陽已  
失巡撫薛國用固留之不可曰奉命守遼陽非守廣寧  
也曰遼陽歿矣若何之曰將以殲敵曰二百人能殲敵  
乎曰不能則死之前至遼河遇逃卒十餘萬神武以忠  
義激其師欲與還戰帥不從乃獨率所部渡河抵首山

去遼陽十七里而軍將士不食已一日遇

大清兵疾呼奮擊孤軍無援盡歿於陣監軍御史方震  
孺繪神武像率將士羅拜為文祭之詔贈都督僉事世  
廕千戶立祠祀之又有楊宗業梁仲善者皆援遼總兵  
官宗業歷鎮浙江山西楊鎬四路敗後命提兵赴援至  
是父子並戰死仲業亦戰死遼陽城下宗業贈都督同  
知世廕千戶仲善贈都督僉事增世廕三級並從祠附  
祀

羅一貫甘州衛人以叅將守西平堡遼陽陷西平地最  
衝一貫悉力捍禦巡撫王化真言於朝加副總兵時化  
貞駐廣寧經畧熊廷弼駐右屯總兵劉渠以二萬人守  
鎮武祁秉忠以萬人守閭陽而一貫帥三千人守西平  
已定議各繕隍堅壘急則互相援違者必誅天啟二年  
正月

大清兵西渡河經撫戒勿輕戰兵漸近叅將黑雲鶴出  
擊一貫止之不從明日雲鶴戰敗奔還城追兵殲焉一



貫憑城固拒用礮擊傷者無算

大清樹旗招降且遣使來說一貫不從又明日騎益衆環城力攻一貫流矢中目不能戰火藥矢石盡乃北面再拜曰臣力竭矣遂自剄都司陳尚仁王宗信亦死之化貞知城未下信遊擊孫得功語盡發廣寧兵以得功及中軍遊擊祖大壽為前鋒令會秉忠赴援廷弼亦遣使督渠進戰遇

大清兵於平陽得功懷異志欲引去乃分兵為左右翼

稍却推渠秉忠前渠等力戰頗有殺傷得功及副將鮑承先走後軍見之亦奔遂大潰渠戰死秉忠被二刀三矢家衆扶上馬奪圍出創衆卒於途副將劉徵擊殺十餘人乃死大壽走覺華島得功遂降越二日廣寧即破事聞贈一貫都督同知世廕副千戶渠秉忠少保左都督增世廕三級再廕指揮僉事皆賜祭葬建祠並祀一貫子俊傑承廕崇禎中仕至宣府總兵官免歸李自成犯甘州城陷死之渠京城巡捕營副將也以御史楊鶴

薦擢總兵官援勦遼東遼陽被圍廣寧總兵李光榮不能救反斷河橋截軍民歸路總督文球劾罷之即以渠代西平告急帥鎮武兵往援遂戰歿秉忠陝西人萬厯四十四年為永昌參將伊勒敦達春以二千餘騎入塞秉忠提兵三百拒之轉戰兩晝夜援軍至始遁秉忠追還所掠人畜邊人頌之擢涼州副總兵經畧袁應泰薦其智勇令率私卒守蒲河至則遼陽已破命為援勦總兵官駐防閭陽援西平竟死自遼左軍興總兵官陣亡

者凡十有四人撫順則張承蔭四路出師則杜松劉綎  
王宣趙夢麟開原則馬林潘陽則賀世賢尤世功渾河  
則童仲揆陳策遼陽則楊宗業梁仲善是役渠與秉忠  
繼之朝端卹典俱極優崇而領軍之將若李如柏麻承  
恩輩竟有未膺顯戮者

滿桂蒙古人幼入中國家宣府稍長便騎射每從征多  
斬馘軍令獲敵首一予一官否則賚白金五十桂屢得  
金不受職年及壯始為總旗又十餘年為百戶後屢遷

潮河川守備楊鎬四路師敗薦小將知兵者數人首及桂移守黃土嶺為總督王象乾所知進石塘路遊擊喜峯口參將天啟二年大學士孫承宗行邊桂入謁壯其貌與談兵事大奇之及出鎮山海即擢副總兵領中軍事承宗幕下文武輻輳獨用桂桂椎魯甚然忠勇絕倫不好聲色與士卒同甘苦明年承宗議出關修復寧遠問誰可守者馬世龍薦孫諫及李承先承宗皆不許袁崇煥茅元儀進曰滿桂可但為公中軍不敢請耳承宗

曰既可安問中軍呼桂語之慨然請行世龍猶疑其不可承宗不聽即日置酒親為之餞桂至寧遠與崇煥協心城築屹然成重鎮語具宗煥傳中時蒙古部落駐牧寧遠東鄙遼民來歸者悉遭劫掠承宗患之四年二月遣桂及總兵尤世祿襲之大凌河諸部號泣西竄東鄙以寧恭圖綽哈宰桑諸部陽受款而陰懷反側桂善操縱諸部咸服歲省撫賞銀不貲初城中郭外一望邱墟至是軍民五萬餘家屯種遠至五十里承宗上其功詔

擢都督僉事加銜總兵承宗乃令典後部與前部趙率  
教相犄角督餉郎中楊呈秀侵尅軍糧副將徐連激之  
變圍崇煥署憚桂家卒勇猛不敢犯結隊東走桂與崇  
煥追斬首惡撫餘衆而還六年正月我

大清以數萬騎來攻遠邇大震桂與崇煥死守始攻西  
南城隅發西洋紅夷礮傷攻者甚衆明日轉攻南城用  
火器拒却之圍解帝大喜擢都督同知實授總兵官再  
論功加右都督廕副千戶世襲桂疏謝並自叙前後功

優詔褒答再進左都督桂初與率教深相得是役也怒其不親救相責望帝聞之下敕戒勉而崇煥復與桂不和言其意氣驕矜謾罵僚屬恐壞封疆大計乞移之別鎮以關外事權歸率教舉朝皆知桂可用慮同城或傾事遂召還督師王之臣力言桂不可去而召命已下又請用之關門崇煥皆不納閏六月乃命以故秩僉書中軍府事未幾崇煥亦自悔請仍用之臣言帝可之命桂掛印移鎮關門兼統關外四路及燕河建昌諸軍賜尚



方劍以重事權七年五月

大清兵圍錦州分兵畧寧遠桂遣兵救被圍衆離山桂  
與總兵尤世祿赴之大戰相當遂入寧遠城與崇煥為  
守禦計俄

大清兵進薄城下桂率副將尤世威等出城迎頗有殺  
傷桂亦身被重傷捷聞加太子太師世蔭錦衣僉事及  
崇煥休去之臣再督師盛推桂才請仍鎮寧遠會蒙古  
綽花諸部離散桂與之臣多收寘之麾下莊烈帝已嗣

位詔之臣毋蹈袁應泰王化貞故輒竝責桂阿之臣意  
桂遂請病乞休不允崇禎元年七月言官交劾之臣因  
及桂之臣罷桂亦召還府適大同總兵渠家楨失事命  
桂代之大同久恃款弛備察罕部西侵順義王遂入境  
大掠家楨及巡撫張翼明論死察罕部遂挾賞不去桂  
至徧閱八路七十二城堡邊備大修軍民恃以無恐明  
年冬十月

大清兵入近畿十一月詔諭勤王桂率五千騎入衛次

順義與宣府總兵侯世祿俱戰敗遂趨都城帝遣官慰

勞犒萬金令與世祿俱屯德勝門無何合戰世祿兵潰

桂獨前鬪城上發大礮佐之悞傷桂軍桂亦負傷令入

休甕城旋與袁崇煥祖大壽竝召見桂解衣示創帝深

嘉歎十二月朔復召見下崇煥獄賜桂酒饌令總理關

寧將卒營安定門外桂驍勇敢戰所部降丁間擾民桂

不能問副將申甫所統多市人桂軍凌之夜發矢驚其

營有死者御史金聲以聞帝亦不問及大壽軍東潰乃

拜桂武經畧盡統入衛諸軍賜尚方劍趣出師桂曰敵勁援寡未可輕戰中使趣之急不得已督黑雲龍麻登雲孫祖壽諸大將以十五日移營永定門外二里許列柵以待

大清兵自良鄉回明日昧爽以精騎四面蹙之諸將不能支大敗桂及祖壽戰死雲龍登雲被執帝聞震悼遣禮部侍郎徐光啟致祭贈少師世廕錦衣僉事襲陞三級賜祭葬有司建祠孫祖壽字必之昌平人萬厯中舉

武鄉試授固關把總天啟二年歷官署都督僉事為薊  
鎮總兵官孫承宗行邊議於薊鎮三協十二路分設三  
大將以祖壽領西協轄石匣古北曹家牆于四路駐遵  
化而江應詔領東協駐關門轄山海關一片石燕河建  
昌四路馬世龍領中協駐三屯營轄馬蘭松棚喜峰太  
平四路經畧王在晉總督王象乾僉謂永平設鎮本以  
衛山海今移之三屯則去山海四百里於應援為疎遵  
化去三屯止六十里今竝列兩鎮於建牙為贅請令世

龍仍鎮永平以東協四路分隸世龍應詔而以中西二

協專隸之祖壽仍鎮三屯章下兵部署事侍郎張經世

議如其言承宗堅執如初乃命祖壽移鎮遵化七年錦

州告警祖壽赴援不敢戰被劾罷歸及是都城被兵散

家財招回部曲從滿桂赴鬪竟死贈卹如制祖壽初守

固關邁危疾妻張氏割臂以療絕飲食者七日祖壽生

而張氏旋死遂終身不近婦人為大帥部將以五百金

遺其子於家却不受他日來省賜之卮酒曰却金一事

善體吾心否則法不汝宥也其秉義執節如此

趙率教陝西人萬厯中歷官延綏參將屢著戰功已劾  
罷遼事急詔廢將蓄家丁者赴軍前立功率教受知於  
經畧袁應泰擢副總兵典中軍事天啟元年遼陽破率  
教潛逃罪當死倖免明年王化貞棄廣寧關外諸城盡  
空率教請於經畧王在晉願收復前屯衛城率家丁三  
十八人以往蒙古據其地不敢進抵中前所而止其年  
遊擊魯之甲以樞輔孫承宗令救難民六千口至前屯

盡驅蒙古於郊外率教乃得入編次難民為兵繕雉堞  
謹斥堠軍府由是粗立既而承宗令裨將陳練以川湖  
土兵來助前屯守始固而率教所招流亡至五六萬擇  
其壯者從軍悉加訓練餘給牛種大興屯田身自督課  
至手足胼胝承宗出關閱視大喜以所乘輿贈之蒙古  
呼爾敦圖素為總督王象乾所撫其部下楚庫魯者善  
為盜率教捕斬四人招撫僉事萬有孚與率教有隙遂  
以故敗款事訴之象乾象乾告兵部尚書董漢儒將斬



之賴承宗貽書漢儒得不死時承宗分關內外為五部以馬世龍王世欽尤世祿領中左右部而令率教與副將孫諫領前後部部各萬五千人率教仍駐前屯四年九月承宗暴其功於朝擢署都督僉事加銜總兵五年冬承宗去高第來代諸將多所更置率教善事第第亦委信之六年二月蒙古以寧遠被圍乘間入犯平川三山堡率教禦之斬首百餘級奪馬二百匹追至高臺堡乃還捷聞帝大喜立擢都督同知實授總兵官代楊麒

鎮山海關尋論功再進右都督世廕本衛副千戶時滿桂守寧遠亦有盛名與率教深相得及寧遠被圍率教遣一都司四守備東援桂惡其稽緩拒不納以袁崇煥言乃令入既解圍率教欲分功桂不許且責其不親援兩人遂有隙中朝聞之下敕戒諭而桂又與崇煥不和乃召還桂令率教盡統關內外兵移鎮寧遠七年正月大清兵南征朝鮮率教督兵抵三岔河為牽制卒無功三月崇煥議修築錦州大凌河中左所三城漸圖恢復

率教移鎮錦州護工再加左都督五月

大清兵圍錦州率教與中官紀用副將左輔朱梅等嬰城固守發大礮頗多擊傷相持二十四日圍始解時桂亦著功寧遠因稱寧錦大捷魏忠賢等蒙重賞率教加太子少傅廕錦衣千戶世襲崇禎元年四月移鎮永平兼轄薊鎮八路踰月掛平遼將軍印再移至關門明年大清兵由大安口南下率教馳援三晝夜抵三屯營總兵朱國彥不令入遂策馬而西十一月四日戰於遵化

中流矢陣亡一軍盡歿帝聞痛悼賜卹典立祠奉祀率  
教為將廉勇待士有恩勤身奉公勞而不懈與滿桂並  
稱良將二人既歿益無能辦東事者國彥以崇禎二年  
四月為薊鎮中協總兵官駐三屯營十一月六日

大清兵臨城副將朱來同等挈家潛遁國彥憤榜諸人  
姓名於通衢以所積俸銀五百餘衣服器具盡給部卒  
具冠帶西向稽首偕妻張氏投繯死

官惟賢萬厯末為甘肅斐家營守備天啟二年以都司

僉書署鎮番參將事歷宣府遊擊延綏西路參將仍移

鎮番五年春河套松山諸部入犯惟賢偕參將丁孟科  
大敗之斬首二百四十餘級明年春巴勒濟喇嘛台吉  
復糾松山伊勒敦達春及威摩蘇薩喇台吉以三千騎  
來犯惟賢再敗之獲首功二百有奇薩喇台吉被創死  
進惟賢副總兵其冬伊勒敦等以薩喇台吉之死挾憤  
圖報益糾河套圖巴台吉等分道入掠惟賢及鎮將徐  
永壽等亦分道拒之共獲首功百有六十七年春伊勒

敦必圖威摩蘇巴勒濟喇嘛合土默特浩爾齊等由黑  
水河入惟賢及西路副將陳洪範大破之斬首百八十  
餘級當是時西部頻寇邊惟賢屢挫其鋒其秋王之臣  
督師遼東乞惟賢赴關門明年崇禎改元惟賢至用為  
山海北路副總兵二年冬京師有警惟賢入衛總理馬  
世龍令急援寶坻溇縣明年正月九日

大清兵自撫寧向山海翼日至鳳凰店離關三十里列  
三營惟賢參將陳維翰等設兩營以以待合戰互有殺

傷已

大清兵返撫寧世龍令惟賢率維翰及遊擊張奇化李居正王世選王成等往襲遵化至城西波羅灣城中兵出擊前鋒殊死戰

大清兵收入城後隊乘勢進攻城上矢石如雨尋復遣兵出戰惟賢陷陣中箭死士卒殺傷者三百餘人奇化亦戰歿

何可綱遼東人天啟中以守備典袁崇煥寧遠道中軍

廉勇善撫士卒六年寧遠被圍佐崇煥捍禦有功進都  
司僉書明年再被兵復堅守遷參將署寧遠副將事崇  
禎元年巡撫畢自肅令典中軍及崇煥再出鎮復以副  
將領中軍事靖十三營之變崇煥欲更置大將上言臣  
昔為巡撫定議關外止設一總兵其時魏忠賢竊柄崔  
呈秀欲用其私黨增設三四人以致權勢相衡臂指不  
運乃止留寧遠及前鋒二人而臂指之不運猶故也臣  
以為寧遠一路斷宜並歸前鋒總兵駐關內者掛平遼



將軍印轄山石二路而以前屯隸之駐關外者掛征遼  
前鋒將軍印轄寧遠一衛而以錦州隸之薊遼總兵趙  
率教久習遼事宜與山海麻登雲相易掛平遼將軍印  
關外總兵舊有朱梅祖大壽梅已解任宜併歸大壽駐  
錦州而以臣中軍何可綱專防寧遠可綱仁而有勇廉  
而能勤事至善謀其才不在臣下臣向所建監實可綱  
力請加都督僉事仍典臣中軍則一鎮之費雖裁一鎮  
之用仍在臣妄謂五年奏凱者仗此三人之力用而不

效請治臣罪帝悉從之可綱佐崇煥更定軍制歲省餉  
百二十萬有奇以春秋二防功進職右都督二年冬京  
師被兵與大壽從崇煥入衛數有功崇煥下吏乃隨大  
壽東潰復與歸朝明年正月永平灤州失守可綱戰古  
冶鄉及雙望頗有斬獲四月樞輔孫承宗令可綱督諸  
將營雙望諸山以綴永平之師令大壽諸軍直趨灤州  
灤州既復

大清兵棄永平去可綱遂入其城論功加太子太保左

都督已而錦州被圍可綱督諸將赴救立功郵馬山復進秩四年築城大凌河命可綱偕大壽護版築八月甫竣工

大清以十萬衆來攻可綱等堅守不出久之糧盡援絕大壽及諸將皆欲降獨可綱不從令二人掖出城外殺之可綱顏色不變亦不發一言含笑而死

黃龍遼東人初以小校從復錦州積功至參將崇禎三年從大軍復灤州功第一遷副總兵尋論功進秩三等

為都督僉事世廕副千戶登萊巡撫孫元化以劉興治  
亂東江請龍往鎮兵部尚書梁廷棟亦薦龍為總兵官  
與元化恢復四衛從之先是毛文龍死袁崇煥分其兵  
二萬八千為四協命副將陳繼盛參將劉興治毛承祚  
徐敷奏主之後改為兩協繼盛領東協興治攝西協語  
詳崇煥傳興治兇狡好亂與繼盛不相能其兄參將興  
祚陣亡繼盛誤聽謀報謂未死興治憤擇日為興祚治  
喪諸將咸弔繼盛至伏兵執之竝執理餉經歷楊應鶴

等十一人袖出一書宣於衆詭言比繼盛誣興祚詐死  
及以謀叛誣陷已者遂殺繼盛及應鶴等又偽為島中  
商民奏一通請優卹興祚而令興治鎮東江舉朝大駭  
以海外未遑詰也興治與諸弟兄放舟長山島大肆殺  
掠島去登州四十里時登萊總兵官張可大赴援永平  
帝用廷棟言趣可大還登州授副將周文郁大將印令  
撫定興治會永平已復興治稍戢返東江龍葭皮島受  
事興治猶桀驁如故四年三月復作亂杖其弟興基殺

參將沈世魁家衆世魁率其黨夜襲殺興治亂乃定遊

擊耿仲明之黨李梅者通洋事覺龍繫之獄仲明弟都

司仲裕在龍軍謀作亂十月率部卒假索餉名圍龍署

擁至演武場折股去耳鼻將殺之諸將為救免未幾龍

捕斬仲裕疏請正仲明罪會元化劾龍尅餉致兵譁帝

命充為事官而覈仲明主使狀仲明遂偕孔有德反以

五年正月陷登州招島中諸將旅順副將陳有時廣鹿

島副將毛承祿皆往從之龍急遣尚可喜金聲桓等撫

定諸島而躬巡其地慰商民誅叛黨縱火焚其舟賊黨  
高成友者據旅順斷關寧天津援師龍令遊擊李維鸞  
偕可喜等擊走之即移駐其地援始通其冬有德等欲  
棄登州走入海龍遣副將龔正祥率舟師四千邀之廟  
島颶風破舟正祥陷賊中後居登州謀為內應事露被  
殺初龍駐旅順大治兵賊拘龍母妻及子以脇之龍不  
顧六年二月有德仲明屢為巡撫朱大典所敗航海遁  
去龍度有德等必遁遁必經旅順邀擊之有德幾獲而

逸斬賊魁李九成子應元生禽毛承祿蘇有功陳光福  
及其黨高志祥等十六人獲首級一千有奇奪還婦女  
無算獻俘於朝帝大喜磔承祿等傳首九邊復龍官承  
祿文龍族家子也有德等大憤欲報龍會賊舟泊鴨綠  
江龍盡發水師勦之七月有德等偵知旅順空虛遂引  
大清兵來襲龍數戰皆敗火藥矢石俱盡語部將譚應  
華曰敵衆我寡今夕城必破若速持吾印送登州不能  
赴即投諸海可也應華出龍率惟鸞等力戰圍急知不



能脫自刎死惟驚及諸將項祚臨樊化龍張大祿尚可  
義俱死之事聞贈龍左都督賜祭葬予世廕建祠曰顯  
忠惟驚等附祀以副總兵沈世魁代龍為總兵官世魁  
本市儉其女有殊色為毛文龍小妻世魁倚勢橫行島  
中至是為大帥七年二月廣鹿島副將尚可喜降於我  
大清島中勢益孤十年朝鮮告急世魁移師皮島為聲  
援有德等來襲世魁戰敗率舟師走石城副將金日觀  
陣歿登萊總兵陳洪範來援不戰而走世魁亦陣亡士

卒死傷者萬餘從子副將志科集潰卒至長城島欲得世魁敕印監軍副使黃孫茂不予志科怒殺之並殺理餉通判邵啟副將白登庸遂率所部降

大清諸島雖有殘卒不能成軍朝廷亦不置大帥以登萊總兵遙領之而已明年夏楊嗣昌決策盡徙其兵民於寧錦而諸島一空

金日觀不知何許人天啟五年以將才授守備効力關門擢鎮標中軍遊擊加參將行薊鎮東路遊擊事專領

南兵崇禎初加副總兵守馬蘭峪三年正月

大清兵破京東列城兵部侍郎劉之綸遣部將吳應龍等結營毛山規取羅文谷關師敗日觀遣二將馳援亦敗歿

大清兵乘勝據府君玉皇二山進攻馬蘭城甚急日觀堅守親然大礮礮炸焚頭目手足意氣不衰乞援於總理馬世龍令參將王世選等赴救兵乃退尋復以二千餘騎來攻日觀偕世選等死守不下朝廷獎其功驟加

都督同知四月與副將謝尚政曹文詔等攻復大安城  
遂偕諸軍復遵化錄功進左都督時總兵鄧玘轄馬蘭  
松棚二路日觀應受節制以玘銜都督同知不屑為之  
下總督曹文衡劾日觀器小易盈恃功驕縱帝特戒飭  
而已久之移萊州副總兵十年春

大清兵攻朝鮮命從登萊總兵陳洪範往救駐師皮島  
大清遣孔有德耿仲明尚可喜等先攻鐵山四月分兵  
攻皮島水陸夾攻副將白登庸先遁洪範亦避走石城

登庸尋率所部降日觀偕諸將楚繼功等相持七晝夜  
力不能支陣歿島城隨破贈特進光祿大夫太子太師世  
廕錦衣副千戶建祠繼功等贈卹有差

贊曰古人有言彼且為我死故我得與之俱生故死封  
疆之臣君子重之觀遼左諸帥委身許國見危不避可  
謂得死所者與於時優卹之典非不甚渥然而無救於  
危亡者廟算不定僨事者不誅文墨議論之徒從而撓  
之徒激勸忠義無益也

明史卷二百七十一

欽定四庫全書

明史卷二百七十一考證

賀世賢傳巡撫薛國用亦奏三可慮

臣黃壽齡按三

可慮傳未詳載考薛國用傳亦未及他書皆無可考

謹識

賀世賢傳天啟元年三月我

大清以重兵薄瀋陽

臣黃壽齡恭按

高皇帝實錄大軍取瀋陽明偵卒知我師夜至聲砲舉

烽火漏二鼓馳告瀋陽城總兵賀世賢尤世功大驚  
我軍師至營於城東七里令軍士樹雲梯楯車攻其  
東面謹識

賀世賢傳

尤世功附

世功引兵援亦戰死

臣

黃壽齡按賀

世賢及尤世功戰死事恭按

高皇帝實錄時我軍奮勇衝入明兵七萬人俱潰我軍  
繞城縱擊並斬殺叅將夏國卿張綱段展陳相等遂  
拔城盡殲其衆謹識



童仲揆傳副將朱萬良姜弼不救及圍急始前一戰即  
敗走

臣黃壽齡恭按

高皇帝實錄天命六年二月我軍至黃山明副將朱萬  
良駐大營於其地見我軍勢盛大驚而遁未及姜弼  
同時敗走謹識

羅一貫傳遂自剄

臣黃壽齡恭按

高皇帝實錄克西平堡即斬羅一貫傳謂一貫自剄與  
當日情事不合謹識

羅一貫傳渠戰死秉忠被二刀三矢家衆扶上馬奪圍  
出創重卒於途副將劉徵擊殺十餘人乃死

臣黃

壽齡恭按

高皇帝實錄我軍師勝追擊五十里斬殺無算至平陽  
橋堡明總兵劉渠祈秉忠及副將劉徵叅將黑雲鶴  
遊擊李茂春張明先死焉傳未及茂春明先謹識

滿桂傳桂與崇煥死守

臣黃壽齡恭按

高皇帝實錄軍士奮勇攻擊間明總兵滿桂寧遠道表

崇煥叅將祖大壽嬰城固守傳未及祖大壽謹識

滿桂傳桂遣兵救被圍荒籬山

臣黃壽齡恭按

文皇帝實錄時兵駐錦州馬步卒凡三萬人直趨大凌河明守城兵遁走傳獨言遣兵救被圍謹識

趙率教傳已劾罷

臣黃壽齡按率教被劾傳未詳何

事他書亦無可考謹識

趙率教傳率教督兵

臣黃壽齡恭按

文皇帝實錄率教督兵時大貝勒阿敏貝勒濟爾哈朗

阿濟格杜度岳託碩託並統軍往征謹識

官維賢傳為甘肅斐家營守備

臣黃壽齡按官維賢

傳未詳籍貫他書亦無可考謹識

欽定四庫全書

附明史卷二百七十一考證後

乾隆四十一年

賜謚諸臣

賀世賢 羅一貫 滿桂 孫祖壽 趙率教

黃龍 張承蔭 杜松 馬林 楊宗業

劉之綸

以上通謚忠烈

尤世功 童仲揆 陳策 周遇吉 張神武

梁仲善 劉渠 祁秉忠 官維賢 張奇化

李維鸞 金日觀 王宣 趙夢麟 袁見龍

鄧起龍 秦邦屏 戚金 胡文傑 雷安民

張名世 朱萬良 姜弼 楚繼功

以上通謚烈愍

朱國彥 謚節愍

何可綱 謚忠節

劉綎 謚忠莊







總校官編修臣吳紹潔